

李

詩

選

註

李詩選註卷之七

溫州樂清蕩南朱諫選註

姪守行校刊

秋日鍊藥院鑷白髮贈元六兄林宗

木落識歲秋  
瓶冰知天寒  
桂枝日已綠  
拂雪凌雲端  
弱齡接光景  
矯翼攀鴻鸞  
投分三十載  
枯榮同所歡  
長吁望青雲  
鑷白坐相看  
秋顏入曉鏡  
壯髮凋危冠

賦也淮南子曰木落而知天下之秋瓶冰而知天下之寒弱齡猶云弱冠也謂少年之時光景老輝也鴻鸞鳥之大而能高飛者喻元六也投分言其志之相投也三國阮瑀為魏武與劉先主書曰披懷解帶投分託意李善註云分猶志也鑷摘髮之器也鑷白者摘去其白髮也壯髮黑髮也所歡謂所

愛之人也陸機詩云悠悠懷所歡○此李白於鍊藥院鑷白髮而贈元林宗之詩也言天寒木落瓶水生冰桂枝拂雪歲云暮矣景物撩人未免懷我之故舊也蓋自少年曾接光輝即有高山仰止之思志欲矯翼以攀鴻鸞將附下風是我之志也志同道合意氣相投三十年矣出處枯榮無少間異君若鴻鸞之高飛已在青雲之上我則滯於塵泥之中長吁遠望邈不可及鑷白相看我已老矣秋顏入於曉鏡而黑髮凋於危冠侵尋歲暮一無所成柰之何哉

窮與鮑生賈饑後漂母食時來極天人道在豈吟嘆樂毅豈適趙蘇秦初說韓卷舒固在我何事空摧殘

管仲韓信事見前極天人者言得天得人而道大行也樂毅本燕臣以不用而適趙蘇秦說韓惠王曰鄒諺云寧為鷄口

無為牛後惠王太息曰寡人雖不肖必不能事秦故奉社稷  
以從○言我雖貧賤而不見用而可用之具則在於我方其  
未遇之時如管仲之營商以自給韓信之寄食以自資鄙賤  
之事不恥為之及至時來運亨得平天人極其際會之盛一  
旦加諸百姓之上榮出一人之下富貴尊榮舉天下莫能望  
矣夫道者致用之具也道在吾身而在則用有餘矣一時窮  
困何足嘆乎且如樂毅之遠趙言不從計不聽乃舍燕而適  
趙耳蘇秦之說韓言必行計必聽遂能合從以擯秦也一卷  
一舒其機在我功名富貴可自取也豈終困窮而已乎

書情贈蔡舍人雄

嘗高謝太傅携妓東山門楚舞醉碧雲吳歌斷清猿暫因蒼生  
起談笑安黎元余亦愛此人丹霄翼飛翻遭逢聖明主敢進與

巨言

賦也謝安初隱東山或謂之曰安石不起當如蒼生何後為  
太傅令謝玄破秦苻堅師百萬於淝水上丹霄喻禁地也○  
此白書情以贈蔡舍人言我嘗謂謝太傅為高矣携妓東山  
歌舞自適若將終身焉者及為蒼生而起垂紳正笏於朝廷  
之上以談笑而却強敵破苻堅之百萬安元之黎庶其功  
可謂大矣斯人也隱則獨善其身達則兼善天下乃後世所  
宜師法者也我亦愛之而不忘思欲翻飛於丹霄之上置身  
於廊廟之間冀有所立効其尺寸之勲垂芳竹帛之上幸遇  
清朝際此明主故敢露忠誠進讜言陳興巨決治亂將以答  
吾皇之眷顧以仰裨於萬一耳

白璧竟何辜青繩遂成冤一朝去京國十載客梁園猛犬吠九

關殺人憤精蒐皇穹雪冤枉白日開昏氛泰階得夔龍桃李滿  
中原倒海索明月凌山採芳蓀愧無橫草功虛負雨露恩跡謝  
雲臺閣心隨天馬鞍

詩小雅青蠅刺讒也青蠅能污白使黑白頭吟云點白信青  
蠅又歐陽公詩云玉上青蠅生一箇皆謂其能變亂是非冤  
屈也梁園在睢陽界梁孝王所築東苑方三百里內有竹園  
兔園猛犬喻讒賊之人也九關天子之所居也泰階謂三公  
也夔龍賢臣也桃李喻賢才也索珠採芳喻求賢也橫草謂  
戰伐也漢終軍曰愧無橫草之功天馬天子之馬也雲臺見  
前○言雖被讒而去志猶不忘乎君白璧受玷既成冤枉一  
朝去國又客他鄉蓋遭力士貴妃之譖賜金而還山也既而  
不幸陷於永王之禍羣議沸騰必欲見殺幸蒙天子之聖明

回光垂照得雪其枉以開再生之路斯時也宰相得人賢材  
布列野無遺逸之士舉天下之英豪皆為吾皇之所任使也  
以我不肖又無戰伐之功虛蒙再造之恩殺身報國無階可  
進跡雖謝乎雲臺不得備乎將帥之列心則繫乎戎馬而欲  
効此馳驅之勞不敢自愛以負吾君也

夫子王佐才而今復誰論層飈振六翮不日思騰鶩我縱五湖  
掉烟濤恣崩奔夢釣于陵湍英風緬猶存彼希客星隱弱植不  
足援千里一回首萬里一長歌黃鶴不復來清風愁奈何

夫子指蔡舍人也王佐王者之佐也復誰論者言無人可與  
言也緬遠也弱植言其所立之不固白自謂也援攀也黃鶴  
喻子陵也○言舍人有王佐之才出乎時流不日可以登臺  
於廊廟如六翮之遇層飈即當高飛而遠舉也我則謝迹雲

臺縱遊於五湖之煙濤矣夢釣桐江遠想子陵之英風雖千載之遠猶有存者彼乃天子之故人以客星而隱遁誠百世之高士也我以弱植卑劣甚矣安能望後塵而攀其逸駕乎徒尔仰慕之拳拳迴首長歌之不已然而古人不可復作如黃鶴一去不再來矣臨清風而踟躕抑抑興愁柰之何哉亦將尋古人之遺蹤飄然以自適耳

舟浮瀟湘月山倒洞庭波投汨笑古人臨濠得天和閒時田畝中搔背牧鷄鷺別離解相訪應在武陵多

莊子與惠子遊於濠梁之上莊子曰儵魚出遊從容是魚樂也惠子曰子非魚何以知魚之樂莊子曰子非我何以知我不知魚之樂天和人所稟於天地冲和之氣也投汨瀟湘洞庭武陵俱見前○言我之被說見黜乃縱棹遠遊浮瀟湘過

洞庭如莊子觀魚於濠梁怡然自適其天和不必如屈原之迫切投於汨羅而自喪也或於閒暇之時行於田畝之中搔其背養牧其鷄鶩隱居日用之常此外無所營矣此別之後君如訪我當於武陵之地垂花之源以相求也

憶襄陽舊遊贈馬少府巨

昔為大隄客曾上山公樓開窓碧嶂滿拂鏡滄江流高冠佩雄劒長揖韓荊州此地別夫子今來思舊遊

賦也大隄地名在襄陽屬荊州山公山簡也晉永嘉三年山簡出鎮襄陽故有山公樓碧嶂峴山也滄江漢水也拂鏡者水色之映乎鏡言其近也韓朝宗為荊州刺史好賢禮士時人為之語曰生不願封萬戶侯惟願一識韓荊州此地謂襄陽也夫子謂馬少府也○李白憶襄陽舊遊贈馬少府謂我

昔日曾客大隄遊於隄上上山公之樓矣其樓面對峴山而  
碧瘴滿窓下臨漢水而江流拂鏡斯時也適韓公之鎮平荆  
州我嘗服高冠佩雄劔長揖以謁見矣君適官此我得相會  
聚首不久而又別去今者各天一方未免追憶於舊遊矣  
朱顏君未老白髮我先秋壯志恐蹉跎功名若雲浮歸心結遠  
夢落日懸春愁空思羊叔子墮淚峴山頭

雲浮易散也功名若雲浮者言其散而無成也羊叔子喻馬  
少府也○言昔日同遊今時相憶君方年少而我已老矣壯  
志蹉跎功名不就歸心形於夢寐之間而春愁懸於落日之  
下勝地難逢舊遊不再念彼故人徒爾興思君乃今之羊叔  
子也我亦為君望峴山而墮淚矣

對雪獻從兄虞城宰

昨夜梁園雪弟寒兄不知庭前看玉樹腸斷憶連枝

賦也梁園者梁孝王之園也玉樹者雪中之樹也○李白對雪以詩獻于從兄言昨夜遇雪我居旅次無衣無褐何以禦寒兄方食祿而錦衣重裘固不知弟有若是之寒也雪中之樹皎如白玉我行庭中見此玉樹未免為之而斷腸何也因樹而憶連枝之人也夫兄弟者一本而生如木之枝實相連者觀雪中之木念連枝之人弟之寒也兄可不知之乎

贈崔郎中宗之

胡蝶拂海翼翱翔鳴素秋驚雲辭沙朔飄蕩迷河洲有如飛蓬人去逐萬里遊登高望浮雲彷彿如舊丘

也沙朔北方沙漠之地河洲河中可居之地也飛蓬上之草隨風而飄轉者也舊丘舊所居之處也○此李白贈崔

郎中之詩內多自敘之辭言胡鴈拂翼於北海之上翔鳴於素秋之時驚辭沙漠將欲南歸乃飄蕩於河洲之上有如飛蓬之人久為羈旅之客倚浮雲而遠望懷舊丘而思歸也蕩然復何所止哉

日從海傍沒水向天邊流長嘯倚孤劒目極心悠上歲晏歸去來富貴安可求

目極者望舊丘也○言日落水流光景易邁倚劒長嘯遠望舊丘目力既竭心亦悠然而遠思也今者胡鴈鳴秋歲又暮矣我將歸來乎富貴不可以妄求也有命存焉豈可求而得哉不如安分之為愈也

仲尼七十說歷聘莫見收魯連進千金珪組豈可酬時哉苟不會草木為我儔希君同携手長往南山幽

說即所謂遊說也莊子云孔子謂老聃曰丘治詩書禮樂易  
春秋六經熟知其故矣以經七十二君論先王之道而明周  
召之跡一君無所鈞用注鈞取也甚矣夫人之難說也珪仕者  
所執之珪組綬也草木為儔隱也猶云與木石居也○承上  
言我之遠遊而欲返于故丘者知富貴不可以妄求也且如  
仲尼大聖歷說七十餘國終以不遇而去未有見用之者仲  
連高士不受千金之贈珪組豈得而酬之乎是知上之遇與  
不遇各自有時時苟不遇則當退處於深山之中與草木為  
儔不可枉求以取辱也我之不遇亦將返吾舊丘與君攜手  
以同行長往南山之幽以遂吾之隱遯可也○按遊說之事  
賢人且不為况聖人乎莊子侮言造端於前而劉向說苑又  
述於後李白從而和之三子者才雖有餘而智皆不足以知

聖人為其未聞道也

贈崔諮議

綠驥本天馬素非伏櫪駒長嘶向清風倏忽凌九區何年西北  
至却走東南隅世道有翻覆前期難豫圖希君一剪拂猶可騁  
中衢

比也綠驥驥之毛色蒼黃者也天馬神馬也相傳產於西北  
渥洼水中龍之精也漢天馬歌云天馬來從西極涉流沙九  
夷服又云天馬來歷無草經千里循東道故白云西北至走  
東南也剪拂者剪其焦毛而拂拭之也劉孝標云顧盼增其  
價直剪拂使其長鳴中衢大道也○此李白贈崔諮議而以  
驥自比也言綠驥本是天馬非人間所有者豈伏櫪之駒乎  
向清風而長鳴歷九州於倏忽是天馬也出自西北之渥洼

遠在萬里之外未知何年涉流沙歷無草走東南而入吾中國也若逢識者之顧盼則當增其倍價矣然世道翻覆有識者稀前途茫昧固難必其有無也遇與不遇亦未可知今幸逢君即為知己者矣猶良驥之遇乎伯樂也所望於君者剪拂其毛鬣長養其精神即可使之奮迅騰踏過都歷塊以騁中衢一日而千里也否則終為伏櫪之駒矣後何所望乎○

贈昇州王使君忠臣

六代帝王國三吳佳麗城賢臣當重寄天子借高名巨海一邊靜長江萬里清應須救趙策未肯棄侯嬴

賦也昇州即金陵也唐為昇州六代即六朝吳晉宋齊梁陳也皆都金陵三吳者吳郡吳興丹陽也吳郡即今蘇州吳興今湖州丹陽今鎮江佳麗者謝朓詩云江南佳麗地金陵帝

王州巨海者昇州東極于海也一邊者四方之一面也金陵  
西帶長江江自蜀山以至于海孔明送吳使者云萬里之行  
實始於此史記公子無忌救趙而用侯嬴之策事見前○此  
送昇州王使君言昇州乃六朝之舊都三吳之故地實江南  
之要衝也惟賢人可以當此重寄天子乃借君之高名以為  
一方之屏翰也且昇州之地阻海帶江付託得人則巨海靜  
於一邊而無揚波之警長江清於萬里而有天塹之險夫天  
子得人則天下安賢人得友則功業著如公子無忌之救趙  
用侯嬴之謀則一戰而成功故凡謀國者必資於賢才也君  
如用人豈彙我乎

贈別從甥高五

魚目高泰山不如一璵璫賢甥即明月聲價動天門能成吾宅

相不減魏陽元

賦也魚目魚之目圓白似珠者也韓詩外傳曰白骨類象魚目似珠璵璠即璠璵美玉也左傳季華子卒陽虎將以璠璵斂明月珠也張景陽詩銑誇璵璠魚目笑明月天門天子之門也晉魏舒字陽元少孤為外家寧氏所養寧氏起宅相宅者曰當出貴甥外祖母以盛氏幼少而慧意謂應之舒曰當為外氏成此宅相後為司徒○此李白贈別從甥高五內多自敘之辭首則美從甥也蓋天下之貴者莫如珠玉似是而非者不足為珍矣故魚目與珠類雖相若而貴賤實不同故雖高如太山不如一璠璵也璠璵不及而况珠乎賢甥即明月之珠也論其所直不啻萬金則聲價動乎天門而光輝昭於上國魚目固不足道又豈璠璵之可比乎賢甥即此明

月之珠誠為希世之寶能成吾之宅相者當不減於魏之陽元也

自顧寡籌畧功名安所存五木思一擲如繩繫窮猿懸巾駿馬空堂上醉人喧黃金久已罄為報故交恩

自白自謂也籌策畧謀也存在也五木擣菹也史劉裕擣菹一擲百萬罄金報恩李白上裴安州之書可見矣○此李白之自敘也言賢甥雖能有光於我我亦窮困甚矣籌略既疎功名不就不如劉裕之五木一擲而得百萬柄栖然若窮猿之見繫不得以自展也謂駿馬以待嘉賓散黃金以報舊恩我以寡籌而致窮困如此視賢甥誠有間矣

聞君隴西行使我清心鬼與尔共飄飄雪天各飛翻江水流或卷此心難具論貧家羞好客語拙覺辭繁三朝空錯莫對飯却

慙冤

唐隴西郡在隴山之西朝始也漢書三朝受圖謂歲朝月朝日朝乃元旦也錯莫即寂寞也冤枉也慙冤言愧其在顧也○此敘相別之情言聞吾賢甥有隴西之行使我心魂為清淒然自悲吾與賢甥俱客他方飄零歲暮無有定居且江水之流猶有迴轉之處此心之抑抑者安可以盡論哉家貧乏物以將情實羞見乎佳客也語拙不能於簡當亦自覺其辭繁矣當此歲首之時猶是寂寞之境留君一飯徒爾增我之腴顏而勤君枉顧之勞矣

自笑我非夫生事多契闊積蓄萬古憤向誰得開豁天地一浮雲此身乃毫末忽見無端倪太虛可包括

非夫非丈夫也左傳曰命為軍師而卒以非夫謂以閹人為

軍師而非丈夫也契闊相遠也倪際也莊子云反覆終始不知端倪包括者言色舉而囊括之也○復自敘其平生之所抱負言我自笑非真丈夫也生事契闊一無所成憤世閔亂之心久蓄于中復向何人以舒豁乎夫天地之大一浮雲也此身之眇直毫末耳吾將究天地之始終而大觀之則忽然之間有以見其廣大之至但無端倪之可尋也然吾此身即同天地一腔之小可以包括乎太虛矣是則萬古同一時天地同一身大觀苦此功名富貴不足論矣

去去何足道時岐空復愁肝膽不楚越山河亦衮裯雲龍將相從明主會見收成功解相訪源水壺花流

衮被也裯裯被也楚越言其相遠衮裯言其同處也易曰雲從龍風從虎聖人作而萬物覩龜源見前○言丈夫事業當

以天下為度古今為期一時離別何足道哉雖當臨岐不必  
愁也苟能同心同德以肝膽相照而無楚越之分雖有山河  
之隔若處衾裯之內固無彼此之殊也賢甥此去或遇明君  
因材取用成功之後倘若訪我須於莖花之源是吾隱居之  
地也

贈裴司馬

翡翠黃金縷繡成歌舞衣若無雲間月誰可比光輝

比也以美女而自比也翡翠金縷舞衣之飾也光輝容貌服  
飾之盛也○此李白贈裴司馬之詩而以美女自喻言美女  
者善於歌舞翡翠金縷繡成舞衣光輝艷冶絕世所無若非  
雲間之月誰可與之為比倫哉譬之材俊之士超羣出類宜  
為舉世之無雙者矣

秀色一如此多為衆所譏君思移昔愛失寵秋風歸

歸者言其失寵而歸於家也○承上言美女秀色如此多為衆女所妬羣起而訕謗之無所不至則君心為之搖惑移昔日之恩情而為今日之踈薄矣值此秋風之時冷落之際失意而歸遙望君門有如萬里以比士之在朝者為羣邪所嫉君心不悟而見逐遂至擯斥於遐方也

愁苦不窺隣泣上流黃機天寒素手冷夜長燭影微十日不滿匹蓬髮亂若絲

流黃機未詳○言既失寵而歸無顏見人乃自含泣躬執機杼之勞意欲不廢女工以自遣也又值天寒而夜長手冷而燭微旬日之久不能滿一匹蓬髮有若亂絲亦不暇於自理也比士之失寵而歸者徬徨困苦有不能以自存者矣

猶是可憐人容華世中稀向君發皓齒顧我莫相違

憐愛也容華者容顏之華美者也子建詩云南國有佳人容華若桃李君謂裴司馬也陸機詩云巧笑發皓齒李長吉云皓齒歌蓋婦人之笑與歌皆啓其唇而齒白外見也○言雖辛苦而蓬髮若絲其秀色猶有可愛者容華之美舉世罕有今者向君歌笑以中情相託君必見憐苟不以讒妬而見棄我將與君同一心以諧老矣以喻已雖流離困苦猶有材能技藝之可取未為全可棄者雖不獲寵於天子猶可納交於朋友也君豈遽棄我乎

贈從孫義興宰銘

天子思茂宰天枝得英才朗然清秋月獨出照吳臺落筆生綺繡操刀振風雷雖屈雖百里鵬鷺望三台

賦也茂宰賢宰也天枝天子之宗支也清秋月喻其清明也  
吳王起臺於姑蘇故曰吳臺屈蠆如蠆之屈而未伸也晉志  
三台六星兩兩而居起文昌列抵太微三公之位也落筆操  
刀鵬騫俱見前○此李白贈義興宰從孫銘言天子之念乎  
斯民也欲得賢宰以司邑政乃選於天潢之內得此英俊之  
才朗然如清秋之明月光輝潔白無纖翳者孤高特出照乎  
姑蘇之臺則百里之內皆囿於清光之下矣落筆揮洒乎文  
章有如綺繡之美麗操刀裁割乎庶政有如風雷之鼓動今  
雖蠆屈暫居一邑終則鵬騫可望三台此百里者豈大賢久  
居之地乎

退食無外事琴堂向山開綠水窈以閒白雲有時來河陽富奇  
藻彭澤縱名杯所恨不見之猶如仰昭回

退食者公自而退食於家也。宓子賤為單父宰，彈琴不下堂，而單父治。故後世以宰之室為琴堂。潘岳為河陽令，潘尼贈詩云：「流聲馥秋蘭，摘藻豐春華。」陶淵明為彭澤令，性嗜酒，有公田三百畝，多令種秫。昭回謂雲漢也。詩大雅云：「倬彼雲漢，昭回于天。」言當政事之暇，退食於家之時，琴堂向山而開，對綠水而間遠望，白雲之往來，其文藻之富有如潘岳之在於河陽，杯酒之樂有如淵明之在於彭澤，茲二人者皆古人也。所恨不得以見之，而思慕之切如仰昭回之天，邈然不可及矣。今者幸於義興之宰一見之也。

元惡皆滔天，疲人散幽草。鷲川無活鱗，舉邑罕遺老。擔雪會稽恥，將奔宛陵道。

元惡大憝，叛逆之徒。安史之類是也。書曰：「象恭滔天。」謂貌象。

恭敬而心狠傲莫漫天然疲人勞人也遺老先代所遺之老  
人蓋有齒德者也唐宣州南陵縣有宛陵蓋徃義興之路也  
會稽恥見前○言當今之時如安史之輩謀為叛逆罪惡滔  
天不容誅矣疲人殘民傷於瘡痍者竄伏深草之間中國若  
無人矣邑里蕭條罕有遺老之存者則耆舊凋零於亂世猶  
若驚川之下無活鱗也然夷狄猾夏天王出狩猶句踐之棲  
於會稽可恥之甚矣君欲擄雪此恥將徃宛陵之道出宰義  
興之邑期以一旅之師圖為復仇之舉殫元惡以佐中興可  
也豈肯以百里之地坐視王室之陵夷乎

亞相素所重投刃應樂林獨坐傷激揚神融一開襟絃歌欣再  
理和樂醉人心蠹政除害馬傾巢有歸禽壺漿候君來聚舞若  
謳吟農人棄簞笠蚕女墮簪纓歡笑相拜賀則知惠愛深

相有左右而分首次亞相次相也舊本李白自注云亞相李公重之以能政中丞李公免職以後官則義興嘗以事去官因二公以復職也莊子庖丁為文惠君解牛奏刀莫不中音合於桑林之舞左傳晉人請以桑林享晉侯孟桑林乃樂舞之名也應桑林合舞者之節也獨坐猶言獨斷也或云謂亞相為專席而坐即前所云獨坐清天下意同但彼以專席言此以獨斷言也傷激揚者言恐賞善殛惡之太過也神融開襟則又和矣再理者去而復職也莊子云黃帝遇牧馬童子問為天下之道童子曰何以異夫牧馬者哉亦去其害馬者而已矣傾巢破巢也喻逃亡之居也壺漿聚舞棄筭墮簪皆言喜其再來○言君以英才出膺百里之寄乃宰相素所推重者也譬之屠牛馬君能迎刃而解奏刀中音合於桑林之

舞無不適其宜矣然當獨坐專斷之時獎善殛惡之際猶恐傷於太過則當濟之以和神融而意舒開襟而見情也且宰相知君復以舊職則絃歌欣於再理而人心無不歡樂者矣蠹政去其害民有如牧馬之法必須去其害馬者也逃民復於舊居有如失棲之鳥仍得歸于故巢也合邑之民望君之至皆壺漿以相迎歌舞以相悅農人則棄其蓑笠女人則墮其簪纓奔走阡陌之間而極歡賀之意民喜君之再來也如此是知君之惠澤及於義興者亦已深矣不然烏能得民若此乎○按簪纓字不獨用於男子蓋婦人之笄上下亦有此飾也簪則釘於笄上而纓則繫於笄下結於喉中宜男子有綌而婦人當平結之也男女冠笄不同而纓則同但有綌無綌之異耳故簪纓字於男女皆可用也

歷職吾所聞稱賢尔為敢化洽一邦名馳三江外峻節貫雲霄道方堪遠大能文變風俗好客留軒盖他日一來遊因之嚴光瀨

歷職言其前後再任也稱賢者人稱之也後漢趙懿疾邪賦云富貴者稱賢最者首也漢書周勃傳云攻槐里好時最注云於將帥之中功為最也一邦則非止一邑矣三江與義興相近峻節高節也方道也通方者通乎道者也揚子云通方之士不可以文亂瀨水流沙上也楚謂之瀨中國謂之磧嚴瀨今在富陽縣○言其再任也凡所歷之職俱有能聲是吾之所聞者也若稱為政之賢則當以尔為首出乎衆人之上矣化洽於一邦名馳於鄰境則又不止於一邑矣其節之高也可以貫乎雲霄其道之通也可以致乎遠大能文則變風

俗為詩書好賢則來嘉賓之車蓋尤見其樂道之不倦也且  
義興與桐江路相隣近我倘他日來訪乎汝而容遊義興即  
當釣古於桐江尋子陵之遺迹以挹其遺風也

草創大還贈柳官迪

天地為橐籥周流行大易造化合元符交媾騰精鬼自然成妙  
用孰知其指的

橐籥者聚散之義也老子曰天地之間其猶橐籥乎管子曰  
天地萬物之橐籥也橐籥皆器也橐囊之無底者所以盛物  
也籥如笛三孔而短小或云七孔吹以出聲者也蓋橐以歛  
之籥以出之喻陰陽之闔闢翕聚發散之道也周流者流行  
而不息也大易者言為變易之大道也符以竹為之相合而  
為信者也媾媾也交媾者陰陽交合也易曰男女媾精萬物

化生騰躍也說文云傳也蓋動而相傳合也精以氣言陽也  
龜以質言陰也萬物之所以成形者也的射者之的也○此  
李白與柳官迪草創大還以天地與人身之陰陽而論其始  
終也言人身肖天地同一陰陽之氣斂之則聚噓之則散以  
天地為橐籥而聚散同一機也行乎大易之道而周流不滯  
則升降屈伸以時而消息也是人身之陰陽即天地之陰陽  
與造化者合其元符略無少異陽氣而陰質氣敷而質受剛  
柔交媾男女之道也精龜騰而男女就則太陽為男太陰為  
女萬物由此而化生天地之妙用由此乎著矣人與天地本  
無二致雖有指的隱於微妙誰復知之皆為物欲所蔽而或  
拘於氣稟者故懵然於日用之間罔覺其所以然也苟舍吾  
身之陰陽而求陰陽於天地者是又惑之甚者矣

羅絡四季間綿微無一隙日月更出沒雙光豈云隻姤女乘河車黃金充轅軛執樞相管轄摧伏傷羽翮朱鳥張炎威白虎守本宅相煎成苦老消鑠凝津液

羅絡周匝而遍也綿微延長而細也日陽也月陰也雙光者不偏也隻則有所偏矣姤女永也河車北方之水腎也漢真人大丹訣曰姤女隱於丹砂中漢漢陽真君歌曰北方正氣名河車抱朴子曰丹砂可為黃金河車可作銀子金肺也水之母也河車之所由生也轅軛所以駕車以行者也樞門所動之機也轄車所運之機也摧伏者有所損傷則隱伏而不見也五行相勝則受尅者為摧伏矣朱鳥即朱雀南方之火心也白虎西方之金肺也相煎者火候之急也苦則不和老則太過皆火候之謬臨爐而不能定其銖兩者也消鑠者融

化也言其銖兩不差剛柔相得而自融化也凝聚也津液者丹之初成聚而為白液也由白而黃黃則堅矣由黃而赤乃成還丹也○此言陰陽之道具於人身者與造化相為流通周行四時而無一息之停綿延微細而無一隙之間與日月相為出沒一陰一陽相配並耀而不孤也蓋獨陰不生獨陽不長大還之道豈可使陰陽之偏勝乎然人身之陰陽雖具於五臟則以心腎肺三者為至要腎為太陰居乾坤長女之位乃北方之坎水水之初生是猶姤女之乘乎河車也肺為少陰居乾坤次女之位乃西方之兌金水由而生是河車以為轆轤所待以行者也車有轆轤始可以行水非金氣何由潤物腎肺相資其機至隱苟能執其樞而運用之則彼此相管轄子母不相離自然生生之不已一或失其機焉則有太

過不及之患太過者無所制不及者受兩制必至於摧殘  
伏若鳥之傷其羽翼不能以自舉矣安能相生乎三者之要  
而又歸重於心肺也蓋火金得宜水自充溢水或不足以制  
火則火炎上而太過火盛必至於傷金則金守本宅而不足  
以生水金火煎熬遂成苦老苦則不甘老則枯索火強金弱  
水無母矣津液何自而生乎火得其宜則金清而水潤金水  
消鑠子母相得自然融化以成津液凝聚於丹田之中秘結  
於寶鼎之內所謂還丹者於此乎胚胎矣

髮鬚明窓塵死灰同至竊擣冶入赤色十二周律曆赫然稱大  
還與道本無隔

髮鬚者想像之也明窓之塵置微者也死灰不然故至竊也  
擣冶者修鍊之謂也入赤色由白而黃黃而至於赤也十二

律曆者一歲之周也周則又復始矣大還者丹一鍊為一轉九轉而為大還大還則丹成矣故曰還丹陽數九故以九為度也道即天地陰陽之道隔異也○此言丹之初成疑為白液之時微細如明窓之塵斂於寶鼎之內寂然不動有若死灰之不復然也體微而靜須并合而擣冷之煉以文武之火謹其節候而調其寒溫乃變白為黃由黃入赤周於一歲循環用工積累既久則自赫然而成丹矣丹成於內則陰陽之精晁交媾而不散得造化之妙用與天地為一體矣然則大易之道不在天地而在於我矣我即造化也夫何間然之有白日可撫弄清都在咫尺北鄴落名南斗上生籍

清都帝居也咫尺近也北鄴北羅鄴山名在冀地鬼神之所居事見前卷晉天文志南斗六星天廓也一曰天機南二星

魁天梁也中二星天相也北二星天庭府也道藏經云北斗落死南斗十二生○言能法陰陽以成還丹則將羽化而飛昇撫弄白日凌其倒影上覲清都以入帝居北酆落其死名南斗上乎生籍可以長生而不死矣壽將與天地而同傾也抑子是何者身在方士格才術信縱橫世途自輕擲吾求仙棄俗君曉損勝益不向金闕遊思為玉皇客鸞車速飛電龍騎無鞭策一舉上九天相携同所適

子謂柳官廸也何者怪之之辭也方法也方士者方外之士也莊子所謂遊於方之外者也至漢則以言神仙者為方士如漢武帝時遣方士入海求蓬萊又如丁義薦方士欒大則方士之名始著於此至唐時則以修鍊者為方士矣如云方士柳泌之類是也格等也猶所謂等流也縱橫者無所拘滯

也擲棄也玉皇客仙人也鸞車龍騎仙人之所御也許慎云  
九天者八方中央也○上論大還之事矣此則致詰於柳官  
而欲其同事也言修煉之徒本為方外之士何為乎而吾子  
之身亦在方士之流乎以是知子之才術無所不通縱橫四  
達而無凝滯也以若是之才術宜見用於斯世今者尚在方  
士之流則世無知己之人乃輕擲乎子耳非子之才術有不  
足也子知求仙而棄俗矣吾亦曉夫損益之道知進之不如  
退也以故不願金闕之遊思為玉皇之客駕鸞車乘龍騎升  
九天而遊於清都之內我將與子携手同往隨其所適畧無  
拘碍凡功名富貴舉不足以介吾意者於世途何足較哉

贈崔司戶文昆季

雙珠出海底俱是連城玊明月特兩達滌輝傍照人英聲振名

都高價動殊隣豈伊箕山故特以風期親

比也以雙珠比其兄弟也連城者一珠之價而直數城也特  
獨也特達者獨出於衆也殊隣猶云殊方遠也長楊賦云殊  
隣絕黨之域箕山許由之所隱風期者未相見而相聞也○  
此李白贈崔司戶兄弟而以明珠為比也言雙珠出於海底  
乃希世之珍有連城之價是明月之珠也超然獨出而並耀  
餘光傍照乎他人君之兄弟才華並秀而光輝外著亦猶雙  
珠之出海而餘光照乎人也英聲振乎名都則輦轂之下無  
不知君之兄弟高價動乎殊隣則遠方之人無不知君之兄  
弟為國之重器也今日與君之相知者豈以同於隱淪有若  
許由之在箕山而後為相知乎蓋於未會之先聞君之風已  
相契矣固不待於今日之會面也

伊昔不自媒擔簦西入秦攀龍九天上忝列歲星臣布衣侍丹墀密勿草絲綸才微惠渥重譏巧生緇磷一去已十年今來復盈旬清霜入曉髮白露生衣巾

媒謀也所以謀合二姓以成婚姻者也仕者求進亦猶婚者之用媒故曰不自媒擔簦長柄笠也即今之小傘也龍君象也漢書云攀龍鱗附鳳翼東方朔為歲星之精待詔金馬門為近侍之臣故白以之自喻也時白亦以待詔而供奉翰林密勿者朝廷嚴禁之地也緇黑色磷薄也論語曰不曰堅乎磨而不磷不曰白乎涅而不緇旬十日也霜入髮髮白也白露生秋也○此白之自敘也言我昔日無有接引之媒去為皇都之客召入翰林待詔金門如東方朔之為歲星謫於武帝之左右以布衣侍於丹墀居密勿之地草絲綸之詔才微寵深

佞倖見嫉而巧生讒謗則白者受緇而堅者被磷不能以自全矣遂至氣逐於遠方與子一別已經十年今幸復會得洽盈旬之樂別久會疎不覺人之易老而清霜入乎曉髮忽驚時之易邁而白露又生乎衣中矣聚散無常而榮枯得失之難齊又如此也

側見綠水亭開門列華茵千金散義士四坐無凡賓欲折月中桂特為寒者薪路傍已竊笑天路將何因垂恩儻丘山報德有微身

側見者傍觀而不敢正視謙之之辭也綠水亭者綠水遶乎亭也列華茵者延賓也折桂為薪喻濟貧也天路喻高遠也丘山言重大也○此李白言司戶尚義好客而望其加惠於已也謂我之流離在道側見君家之富賓客之盛亭臨綠水

堂列華茵千金散於義士輕財而重交也四座無有凡賓皆一時之俊傑也我將矯惠於君欲折月中之桂以為寒者之薪庶幾以自煥耳然月挂在天猶恐路遙望之而不可及攀之而不可得徒為傍人所竊笑也君如我念弗棄寒微肯垂丘山之恩則我之報者亦不淺矣雖至殞身滅性亦不辭也

贈溧陽宋少府陟

李斯未相秦且逐東門兔宋玉事襄王能為高唐賦

賦而此也李斯宋玉事俱見前○此李白贈宋少府之詩兼言已意曰李斯者自謂也曰宋玉者謂宋少府也言李斯未曾相秦之時窮居無事牽黃犬出上蔡東門且逐狡兔以為樂也宋玉事楚之襄王見朝雲而望陽臺神女遂作高唐之賦也宋玉以文章而膺君寵其過於李斯之逐兔亦多矣我

則方於李斯之未遇君可擬於宋玉之才名我亦安敢自望於君乎

常聞綠水曲忽此相逢遇掃酒青天開豁然披雲霧

晉衛玠見樂廣曰若披雲霧以覩青天綠水曲見前○言君有高才猶伯牙之鼓琴有綠水之妙曲也我嘗聞其曲矣未嘗見其人焉忽然於此相遇如披雲霧以覩青天纖翳不留豁然而見其高明也

歲隄紫鸞鳥巢在崑山樹驚風西北吹飛落南溟去

此則比也歲隄文采貌崑山南溟俱見前○言歲隄我文采昭明乃紫鸞之鳥也巢於崑崙之山棲於瓊樹之上自謂有所託矣忽爾驚風起自西北撼彼樹枝不容於安棲者則將飄落於南溟而轉徙於萬里之外也我以微才見用於朝不

久而斥逐者又何以異於是哉此則李白以鳳自比乃敘見用而復見棄也

早懷經濟策特受龍顏顧白玉樓青蠅君臣忽行路人生感分義貴欲呈丹素何日清中原相期廓天步

經濟者經邦而濟世也文中子薛公曰王氏家傳七世皆有經濟之道行路者行道之人言無情也莊子云以道觀分而君臣之義明分乃天之所定義則人之所稟者也丹素心也猶云丹心素心也廓大也天步天運也詩云天步艱難○言我少時已懷經濟之策素有為國之心以布衣而召用受天顏之寵顧將欲輔佐吾君以康斯世不意青蠅生於白玉讒言加於眇躬嫌隙日興君恩遂薄忽如行路之人畧無眷戀之意矣然君臣大倫報乎天性分義之明本乎良心一有所

感而見於日用貴乎展盡底蘊披露中情畧無所隱斯可也  
豈以吾君待之之薄而或貳其心乎今者胡虜亂華中原穢  
濁天運艱難而封疆日侵我將與君洗滌羶掃清華夏復  
祖宗之土宇拓大唐之福幘使國步廓然而廣大可也

戲贈鄭溧陽

陶令日日醉不知五柳春素琴本無絃漉酒用葛巾清風北窓  
下自謂羲皇人何時到栗里一見平生親

賦也淵明五柳無絃琴漉酒巾北窓栗里俱見前○此李白  
用淵明故事戲贈鄭溧陽也言淵明好酒而常醉春來五柳  
亦不知也畜無絃之琴戴漉酒之巾高卧北窓自謂羲皇上  
人是皆淵明之高致也吾平生頭慕惟恨不得以相親者今  
溧陽之地即栗里也溧陽之令即淵明也我又何時到於栗

里以見吾平生之所親慕者乎

遊溧陽北湖亭望瓦屋山懷古贈同旅

朝登北湖亭遙望瓦屋山天清白露始覺秋風還遊子託王人仰觀眉睫間目色送飛鴻邈然不可攀

賦也唐昇州溧陽縣上元二年廢還隸宣州有湖山湖即北湖山即瓦屋山也有人喜怒必形於眉睫之間目色者目視其顏色也溧陽貞女碑云目色以臆授之壺漿言貞女不與交言惟視其顏色也送飛鴻言其視之高也○此李白溧陽懷古言我之遊于溧陽也朝登北湖之亭遙望瓦屋之山但見天氣清明而白露降矣始覺秋風之去而復還也秋去秋來時節易邁有如此夫斯時也客遊未歸託於主人仰視其眉睫之間以窺其喜怒之意因人輕重以為榮辱奈何主人

高視一世而目色遠送乎飛鴻顧盼之下傍若無人邈然不可得而攀也我來溧陽乃羈旅之人耳將有託於同旅者猶恐同旅之不我顧也

長吁相勸勉何事來吳關聞有貞義女振窮深水灣清光了在眼白日如披顏高墳五六墩率律棲猛虎遺迹翳九泉芳名動千古子胥昔乞食此女傾壺漿運開展宿憤入楚鞭平王凜冽天地間聞名若懷霜

吳關吳之昭關也貞義女溧陽黃山人史氏之女清英潔白事母純孝擊綿自業三十而未嫁子胥自楚奔吳疾於中道乞食溧陽遭遇女子擊綿於瀕水之上管中有飯子胥遇之謂曰夫人可得一食乎女曰妾獨與母居三十未嫁飯不可得子胥曰夫人振窮途少飯亦何嫌哉女子知非常人發其

簞簞飯其盎漿長跪與之子胥再食而止女子曰君有遠逝之行何不飽而食之子胥既食而去顧謂女子曰掩夫人之壺漿毋令其露女子嘆曰嗟乎妾與母居三十年自守貞明不顧從適何宜饋飯而與丈夫虧越禮儀妾不忍也子行矣子胥行反顧女子已自投於瀨水矣後子胥破楚鞭平王之屍過瀨上以百金投水報之清光者猶云德輝也披開也披顏者言若見其開顏也○此言懷古也言同旅之人相與嗟嘆勸勉問吾來遊之情意以長安逐客何事遽至吳閔之地不遠千里必有以也我將答之曰為懷古而來也我聞此地古有貞義之女振窮於深水之灣餘光昭昭尚在人目白日之下如見其容顏也人雖已死名則未亡振窮之聲昭於千載然而子胥之窮豈終窮哉及夫適吳之後時運耳通之自

手握重兵以舒宿憤入楚都之內鞭平生之屍忠肝義膽凜冽於天地之間聞子胥之名者心若懷冰莫不竦然而戰慄也士之未遇其困頓如此及其既遇而英烈如彼登高懷古感慨之情將若之何吾同旅之人亦有如貞義女之於子胥者乎吾區區之志將欲為子胥之為凜冽者同旅之人其知之乎

壯士或未達十步九太行與君拂衣去萬里同翱翔

太行見三卷空城雀下○以子胥之事觀之則知文夫之未達也多遭困苦有如行路十步之間九步太行羊腸之險多阻滯也當此國家多事之秋夷狄猾夏之際世路甚難行矣我將與君拂衣而去翱翔於萬里之途展平生之宿憤聲復仇之大義凜冽於天地之間有若子胥之入楚斯可也今日

同旅之勸勉於我者正當相期於戮力豈宜去國而長往哉  
○按此詩乃李白蒙赦之後轉側匡廬之間安史之亂方熾  
而未已故於漂陽懷古感貞義女之事而致意於子胥也噫  
白之慷慨而縱橫大畧似子胥時不遇而地亦異徒爾懷義  
而不得一伸也其感恩報德之性稟於天者竟泯焉而不得  
一見白亦可悲也夫

贈秋浦柳少府

秋浦舊蕭條公庭人吏稀同君樹叢李此地忽芳菲  
搖筆望白雲開簾當翠微時來引山月縱酒酣清輝而我愛夫子淹留未  
忍歸

賦也秋浦諒池州翠微山顛也清輝者山水之光景也謝靈運詩云山水含清輝○言秋浦舊時蕭條今來繁華則柳

府之政可知矣且少府公事多暇賦詩看山對月飲酒又得悠然以自適也因此我愈相愛客遊雖久未忍遽去耳

贈崔秋浦

三首

吾愛崔秋浦宛然陶令風門前五楊柳井上二梧桐山鳥下廳事簷花落酒中懷君未忍去惆悵意無窮

賦也陶淵明嘗為彭澤令門栽五柳號五柳先生○言我愛崔君為秋浦之令以其宛然有陶令之風也門前栽楊柳井上樹梧桐訟庭不喧而山鳥下於廳事公餘舉杯而簷花落於酒中身雖為令而清閒自適如此是即古之淵明也我所以眷眷於懷欲相依歸而不忍去臨別惆悵意有未盡安能遽尔而他往哉○按五楊柳二梧桐虛實相對不必專泥於淵明之有無也大抵李白之詩多欲自我作古不以時俗有

所拘忌此大方家之手筆也如莊子之文縱橫出沒若不拘  
於繩墨者而亦未嘗廢繩墨也以今配古何足疑乎

其二

崔令學陶令北窓常晝眠抱琴時弄月取意任無絃見客但傾  
酒為官不愛錢東臯春事起種黍早歸田

賦也北窓無絃琴俱見前○言崔秋浦之為令即陶令也高  
卧北窓抱琴弄月嗜酒輕財耕田種黍其風致之高邁與淵  
明前後同一揆也曰早歸田者是時崔秋浦尚在官但用淵  
明為令故事擬之而無拘於去就也詩人不泥泥之者失於  
鑿鑿矣

其三

河陽花作縣秋浦王為人地逐名賢好風隨惠化春水從天漢

落山逼畫屏新應念金門客校沙弔楚臣

賦也王為人者言其人之如王之美也風者民俗之所成上  
人之所鼓舞者也天漢河漢也九華山亦有瀑布河陽校沙  
俱見前○言潘岳之河陽則以花為縣秋浦之崔令則以玉  
為人也秋浦之地本自卑陋今得名賢地亦美矣德化所及  
民俗之風日丕變矣有若春陽之煦物物物皆有生意也且  
邑有山水之勝瀑布飛流若銀漢九華秀列如畫屏作邑於  
此寧無樂乎我乃金門之客也遷逐流離有如賈誼之校沙  
而吊屈原於湘水君之於我能無相念之情乎

望九華贈青陽韋仲堪

昔在九江上遙觀九華峯天河掛綠水秀出九芙蓉我欲一揮  
手誰人可相從君為東道主於此卧雲松

賦也九華峯即九子山李白改爲九華云舊註山有瀑布東道者主人之稱也左傳云舍鄭以爲東道主言不伐鄭而欲資其館穀也揮奮也振也揮手奮手相招之狀晉王羲之云眷戀松雲暫迷人路○韋仲堪居青陽故李白即青陽之景以贈之言我昔在九江之上遙望九華之山其瀑布飛流有若天河之懸掛九峯峙列有若秀出之芙蓉我將揮手以招同遊之侶不知何人可以相從乎惟君有山水之情多塵外之想所居又近於九華宜爲東道之主人與我共入此山卧於雲松之下焉然樂以忘斯世可也

贈王判官時余歸隱居廬山屏風疊

昔別黃鶴樓蹉跎淮海秋俱飄零落葉各散洞庭流

賦也黃鶴樓在鄂州洞庭湖中禹貢淮海維揚州零落葉喻

衰散也范曄傳云時賢零落○此贈王判官也白時居隱廬  
山屏風疊言與判官昔日相別在鄂州黃鶴樓蹉跎於淮  
海之上蓋以蹤跡飄零自洞庭分散之後遂久寓於淮海也  
此敘前度之相別

中年不相見蹭蹬遊吳越何處我思君天台綠蘿月會稽風月  
好却繞剡溪回雲山海上出人物鏡中来

中年者言前之別與今之會中間之歲月也蹭蹬行不進貌  
王羲之云行山陰道上如遊鏡中天台會稽剡溪皆吳越之  
地蹭蹬見前○言昔自黃鶴樓一別不復相見我以蹭蹬遊  
于吳越之間見天台之蘿月未免一思君也愛會稽之風月  
繞剡溪而回棹但見雲山遠出於海上人物若遊於鏡中此  
言別後自淮揚而之吳越也

一度浙江北十年醉楚臺荆門倒屈宋梁苑傾鄒枚苦笑我誇誕知音安在哉

楚臺者章華陽臺皆楚地也荊州記荊州郡西岸有山名荆門梁苑即漢梁孝王所築之苑屈原宋玉鄒陽枚皐皆楚人古之能文者也倒猶云壓倒也傾亦倒意○言自會稽渡於浙江醉遊於楚地在荆門則倒乎屈宋於梁苑則傾乎鄒枚是皆楚之古人能文者也我若與之絜長而度短彼當屈體以相讓矣當今之人憚於學古皆笑吾言為誇誕意謂古人高遠非我所及殊不知人有古今學無古今倒屈宋而傾鄒枚固我之能事也夫豈好為大言以欺人乎世無知音之人宜其謂我為誕憚也

大盜劉鴻溝如風掃秋葉吾非濟代人且隱屏風壘中夜天中

望憶君思見君明朝拂衣去永與海鷗羣

大盜指祿山之徒也鴻溝漢高祖與項羽中分天下處在今河南滎陽地方祿山陷東京據有其地矣代世也齊代齊世也屏風疊廬山疊障之名也○承上言我之抱藝浪遊未有所遇不韋遭亂終當歸隱今者祿山陷東都據有天下之半有如項羽之割鴻溝勢若狂風之掃落葉亂亦甚矣然尅亂救民須仗濟世之才以我之區區固非濟世之人也出則恐無所益不如退於廬山之中隱於屏風之疊耕詠自娛以待天下之清也然隱居無朋苦於思舊故中夜望君意欲相見而不可得我亦豈能抑抑久居於此乎即當拂衣而去悠然長往永與海鷗而相親矣○按白在屏風疊又欲與海鷗為羣惟恐避世之不遠也然而不能決去卒蹈永王之禍是乃

李詩選卷之七  
休於勢利昧於幾先非有真知有欲故也欲則蔽蔽則遲疑  
遲疑則緩不及事雖是中心之隱微猶有可取者倡涉兩端  
終不能以自白矣故君子務窮理而貴果斷也

在水軍宴贈幕府諸侍御

月化五白龍翻飛凌九天胡沙驚北海電掃洛陽川虜箭雨宮  
闕皇輿成播遷

賦也月者言一月之間也白北方水色為胡象也指安史等  
而言也五義未詳或曰謂祿山思明慶緒崔乾祐令狐潮之  
類以天寶十四載十一月甲子反自范陽十二月丁酉涖洛陽  
一月之間遂覆東都故云然也或曰是當時之災異有  
化為白龍者白亦胡象五其數也考於唐史天文志無所見  
史於日月暈星孛皆書豈有月龍之大變而不書者乎

未然也夫月化為龍不必言翻飛凌九天矣曰翻飛曰凌者則自下干上之義也李白寓言之意恐未必實有是事前說為當范陽古渤海郡故曰北海電掃言其速也皇輿謂明皇也播遷幸蜀也天寶十五年六月陷京師時明皇已幸蜀矣此永王璘在水軍宴衆官李白作此詩以贈幕府諸侍御也言胡虜之衆相率叛逆一月之間化五白龍而欲翻飛凌歷於九天之上蓋恃鴛鴦欲窺神器腥羶起自范陽胡沙驚乎北海遂入東都之境電掃洛陽之川虜箭如雨飛集宮闕撼動長安乘輿播遷乃出延秋之門以為幸蜀之計矣英王受廟畧秉鉞清南邊雲旗卷海雪金戟羅江烟聚散百萬人弛張在一賢

英王謂永王也廟畧古者天子命將出師必告于祖廟而授

力畧也秉鉞者天子賜諸以斧鉞而後專征伐也南邊謂水  
王領山南江西嶺南黔中四節度也禮記孔子曰一張一弛  
文武之道也鄭玄注云張弛以弓弩喻人也一賢亦謂永王  
也○言永王既受天子之命賜之斧鉞以清南方其出師也  
則雲旗卷乎海雪金戟羅於江垌聚散百萬之師號令於轅  
門之上一張一弛惟在於賢王之一人也以此故王懷雪國  
恥何患功之不成乎

霜臺降群彥水國奉戎旃繡服開宴語天人借撲船如登黃金  
臺遙謁紫霞仙

霜臺御史臺也羣彥諸侍御也蓋朝廷所使有事於軍中者  
也水國謂水軍也奉戎旃者聽命也漢直指御史服繡衣持  
斧天人樓船黃金臺俱現前○此言幕府諸侍御也承君之

命降自霜臺水國諸軍望旌旗而奔走悉遵號命繡衣開乎  
宴語轉嚴肅為和悅天人借乎樓船就水軍而燕賓也幕府  
諸賢得侍親王之清光如登黃金之臺遙謁紫霞之仙也  
卷身縮蓬下冥機四十年寧知草間人腰下有龍泉浮雲在一  
決誓欲清幽燕願與四座公靜談金匱篇齊心戴朝恩不惜微  
軀捐所冀旄頭沒功成追魯連

卷身猶藏身也尚書大傳子貢作茅室編茅為戶彈琴瑟其  
中以歌先王之道冥幽暗之意冥機謂藏其機也草間人謂  
隱伏於草澤者也龍泉劒名吳越春秋云楚子所作決浮雲  
者言其劒用之神也莊子云天下之劒上決浮雲下絕地理  
此劒一用匡諸侯天下服矣幽燕唐屬范陽郡祿山封燕王  
以范陽為巢穴也太史公自敘遷為太史令抽石室金匱之

書漢志昂為旄頭胡星也仲連事見前○承上言諸侍御叅  
謀幕府皆能効力於朝廷我以不才而見棄退處畎畝之中  
歲身編蓬之下潛棲遁迹四十年矣雖是草間之人亦有廊  
廟之志腰下龍泉可以上決乎浮雲用之而無不利非敢以  
自愛也誓欲雪國恥清中原斷逆賊之首復幽燕之地使吾  
君無北顧之憂可也我與在座諸公須同此志談金匱之篇  
講兵畧之要戴君恩而不忘捐微軀而不惜掃除胡虜以滅  
旄頭之妖焰功成身退不受爵賞追仲連之芳躅以揚清芬  
於後世也是我願望於諸侍御者如此諸公其亦知所勉乎  
贈武十七諤弁序

門人武諤深於義者也質木沈悍慕要離之風潛釣川  
海不數、於世間事聞中原作難西來訪余余愛子伯

禽在魯許將冒胡兵以致之酒酣感激援筆而贈

馬如一匹練明日過吳門乃是要離客西來欲報恩笑開燕七首拂拭竟無言

賦也韓詩外傳顏回望吳門馬見一疋練孔子曰此馬之光景也荆軻傳燕太子求天下利匕首得趙人徐夫人匕首取之百金要離事見前○此白在匡廬時其子伯禽在魯令門人武諤往取之而贈以詩也言馬如一疋之練明日過乎吳門是何人也遠來而遽去乃勇義之士古要離之客也自西而來欲報舊恩篤念師友不忘患難笑開短劒拂拭光芒默尔無言意實有在蓋懷義之深者不假於言辭也

狄犬吠清洛天津成塞垣愛子隔東魯空悲斷腸猿林回棄白壁千里阻同奔君為我致之輕齋涉淮源精誠合天道不愧遠

遊蒐

狄謂祿山犬即大羊之謂也洛東京也祿山以天寶十四載  
六月陷東京天津橋名在洛城中愛子李白之子伯禽也時  
在魯地斷腸猿搜神記云臨川有人入山得猿子其母隨而  
啼入竟殺其子母跣躍而死腸皆寸斷莊子曰林回棄千金  
之璧負赤子而逃齊裝也送也輕齋言其行李之薄也晉鄧  
伯道避亂棄子而負其兄之子後竟無嗣時人為之語曰天  
道無知使鄧伯道無兒蒐人心之靈也不愧者言此心之合  
於天也○上言武諤能重義而知報恩此乃託之往山東而  
取其子也言今祿山之徒攻陷東京天津之地皆為戰場吾  
中國之亂極矣吾方避難客於南方吾子伯禽尚寓東魯父  
子相離念之甚切有如斷腸之猿徒自悲耳昔者林回棄白

璧而負赤子吾雖有是心也柰何道路梗塞力不能往不得  
與吾子而偕來矣遂至若是之睽違也君乃義士吾有一日  
之好幸為我而致之蕭然行李涉彼淮源則吾子之來可指  
日而到也然父子之道天性也吾一念之精誠上合天道又  
何愧於遠遊之覓乎天必我鑒使我父子他日或得以相見  
也君其勉之○按他書李白有子伯禽以貞元八年不祿蓋  
李白卒於肅宗之初年伯禽卒於德宗貞元之八年相去三  
十餘年然則白為永王璘事奔亡道中自云草擲二孩者乃  
幼子與幼女也時恐伯禽在魯以故不罹其難耳至貞元而  
卒亦無後矣故青山之塚惟女尚在也

獄中上崔相渙

胡馬渡洛水  
血流征戰場  
千門閉秋景  
萬姓危朝霜

賦也胡馬胡地之馬謂祿山之反也渡洛水者陷東京也祿山以天寶十四載反范陽十二月陷洛陽十五載六月陷長安秋景秋日也朝霜易晞生命之難久也○李白以永王璘事繫尋陽獄上宣撫大使崔公渙言祿山叛逆起自范陽胡馬南侵渡於洛水殺人盈野五流戰場居人逃竄而空門閉乎秋景民不聊生而性命危若朝霜禍亂至此亦云極矣賢相燮元氣再欣海縣康台庭有變龍列宿繫成行

賢相謂崔宣撫也元氣者天地生物之真氣也海縣海內之郡縣也台三台宰相之位也列宿衆星喻百官也變龍見前言胡虜叛逆天下元氣日以耗散得賢宰相燮理調和則陰陽不乖而海宇乂安矣是三台之地有變龍之大臣庶官之職有若列宿之成行皆能盡瘁以事君故能轉亂而爲治

也

羽翼三元聖發輝兩太陽應念覆盆下雪泣拜天光

三元聖謂玄宗肅宗與廣平王也廣平王後為代宗太陽君象兩太陽謂玄宗肅宗也是時廣平王為天下無元帥故不得謂之太陽羽翼者輔佐之也發輝者揚其光也覆盆之下至暗處也故冤者引以為喻抱朴子曰是責三光不照覆盆之內雪洗也○言崔相能左右乎玄宗肅宗代宗之三聖振舉乾綱不失舊物又能顯明乎玄宗肅宗之兩君光復故都如日中天也其功可謂大矣功之大者無物不被何獨遺於我之一人乎應念我之受繫如在覆盆之下有所蔽隔不得自明今將雪泣以拜天光庶幾轉照乎幽隱吾之中情可自白矣為賢宰相者能無鑒此區區乎

中丞宋公以吳兵三千赴河南軍次尋陽脫余之囚叅謀幕府因贈之

獨坐清天下專征出海隅九江皆渡虎三郎盡還珠

賦也獨坐者專席而坐也漢宣乘拜中丞光武詔御史中丞與司隸尚書令會同皆專席而坐京師謂之三獨坐專征者得以自專其征伐也禮記賜鈇鉞然後征海隅吳地也宋均為九江太守郡舊有虎暴及均至虎皆渡河而去孟嘗為合浦太守郡不出穀而產珠貿穀以給食前守貪而珠皆去至嘗廉而去珠復還三郡即三吳也○此李白因宋中丞領兵赴難以白為幕府叅謀白贈以此詩也言中丞位尊朝班專席獨坐能致天下之清使無穢濁之干也專征伐之大權按海隅之舊邦九江三吳悉臻治効如宋均之在九江而魔北

渡河孟嘗之在合浦而去珠復還也中丞德化之及物者有如此夫

組練明秋浦樓船入郢都風高初選將月滿欲平胡殺氣橫千里軍聲動九區白猿慚劍術黃石借兵符

組練戎服也左傳楚子重伐吳使鄧廖率組甲三百練服三千注云漆甲成組文被練袍風高選將者秋高馬肥匈奴犯塞故選將以待之也史記匈奴舉事候星月壯盛則攻戰月虧則退兵此言月滿平胡者因其動而應之也兵應者勝故有可平之理也九區九州也白猿黃石事俱見前○此言中丞之出征也由吳至楚則組練明乎秋浦之地樓船入乎郢都之區風高之時則選將以防秋月滿之候欲平胡而奏凱殺氣橫於千里而所向之無敵軍聲動乎九區若雷霆之震

驚矣其操劍者善乎劍術雖白猿公有所不如談兵者深於兵法乃黃石公之所授受也兵威盛而兵謀壯彼蠢爾之胡虜倖亦不足平矣

戎虜行當剪鯨鯢立可誅自憐非劇孟何以佐良圖

戎虜鯨鯢皆謂安史之徒也良圖善謀也劇孟事見前○承上言軍威壯而兵謀善勝敵有其具矣戎虜之輩行當剪滅鯨鯢之徒立見誅夷不勞於餘力也昔者周亞夫伐吳楚之七國得劇孟以成功吾愧非劇孟也無一得之愚可獻於幕府將何以佐中丞之良謀而成此戡亂之功乎

流夜郎贈辛判官

昔在長安醉花柳五侯七貴同杯酒氣岸遙凌豪士前風流肯落他人後

賦也長安謂帝都也五侯七貴謂當時之富貴者西征賦云  
窺七貴於漢庭注云吳霍上官趙丁傅王也氣岸者言其氣  
宇之高峻若崖岸也南史張充與王儉書曰氣岸踈蕘情途  
洵隔五侯事見四卷君馬黃下○此李白流夜郎時贈辛判  
官之詩蓋判官與白舊時在京相交今出為判官在湖湘間  
白流夜郎經過相見贈以此詩言我昔日遊於長安之時嘗  
醉於花柳之間大臣貴戚曾同飲酒氣岸凌乎豪士睥睨之  
下傍若無人風流蓋乎一時舉世之人吾不多讓也此則白  
之自敘其實乃自誇也

夫子紅顏我少年章臺走馬着金鞭文章獻納麒麟殿歌舞淹  
留玳瑁筵與君自謂長如此寧知草動風塵起

夫子謂辛判官也三輔黃圖曰未央宮有麒麟殿筵席也鋪

陳曰筵玳瑁筵者飾以玳瑁貴者之席也章臺見前○言我  
與君年少之時同遊湖湘走馬於章臺之下同赴京師獻納  
於麒麟之殿朝貴相邀淹留歌舞太平無事享此逸樂自謂  
與君可謂終身無有他虞不意草動塵起禍亂作而干戈興  
吾之身世亦多憂矣

函谷忽驚胡馬來秦宮批李向明開我愁遠謫夜郎去何日金  
雞放赦回

胡馬謂祿山秦宮長安也李喻賢臣向明而開者喻新君  
即位而賢才効用也金雞赦見前○此則言在己之謫於夜  
郎也謂我與判官遊樂未幾而憂患適至祿山倡亂於漁陽  
胡馬忽至於函關新君即位而羣才効用有若批李向明而  
開皆傾心於太陽也凡委質而願仕者悉際風雲之嘉會以

自顯達惟我遠謫夜郎而愁苦百端未知何日得遇金鷄放  
赦將以宥我之罪而復回於故鄉乎○按此詩辭氣粗豪直  
而不婉雖為白之所作亦是流離患難之餘吐露不平之氣  
率意狂吟以成章耳或疑為非白之作者但亦有所見矣

贈常侍御

安石在東山無心濟天下一起振橫流功成復瀟灑大賢有卷  
舒季葉輕風雅佳復屬何人君為知音者

賦也橫流水之汎濫而妄行者瀟灑優閒意大賢謂安石也  
風雅謂文儒也猶云風人大雅君子云耳佳復者國運中衰  
有所匡正而克復之謂也知音謂識人也安石事見前○此  
李白贈常侍御之詩也言安石初卧於東山之時似無濟世  
之心及其一起而立干朝也遂能破符堅之勍敵遏橫流之

汎濫使吾中國之民不遭犬羊之荼毒也談笑之間成此偉  
功何其優閒而瀟灑乎夫窮而有所守出而有所為是大賢  
之卷舒有風雅之古道柰何季世之人淺識鄙見而反輕視  
之也然而晉室中微能匡復者果何人哉乃東山之謝安也  
君為知音者是必知謝安之出處為謝安之事業者也今者  
四海橫流朝廷將有賴於君矣

傳聞武安將氣振長平瓦燕趙期洗清周秦保宗社登朝若有  
言為訪南遷賈

史記秦白起伐韓軍武安西鼓譟勒兵武安屋瓦皆震詩意  
謂當時之李郭也燕趙之地時為安史所據周秦長安之地  
唐故都也賈誼為漢博士文帝議以公卿之任絳灌之輩疾  
之天子不用出為長沙王太傳○言方今胡虜背叛朝廷致

討吾聞大將之出征者若李郭之輩有白起之威氣振長平之瓦敵國為之而寒心矣將以剪除乎醜虜直擣其巢穴燕趙之區為犬羊之所腥穢者期於洗滌而清明周秦之地宗國之故都者保於鞏固而無虞矣王室中興君必大用登朝之時天子咨問君必陳言當以賈生之南遷者從容言之將必見訪而召用也君不我棄吾亦將有宣室之召矣其為榮幸何如乎白蓋自附於賈生而欲常侍御之薦之也常亦白之相知者歟

贈易秀才

少年解長劒投贈即分離何不斷犀象精光暗徃時

比也斷犀象者劒之利也王子淵劒頌曰水斷蛟螭陸斷犀兕精光劒光也○易秀才必有學而不遇者也故李白贈以

此詩言我少年之時與君相交解劔相贈後即別離蓋此劔  
鋒芒用之而無不利者何不以之陸斷犀象而一試之乎苟  
或試之不早則劔光晦蝕無復向者之芒利矣譬之士者幼  
而學之壯而欲行之壯不得行則力衰時邁無復有可為也  
蹉跎君自惜竄逐我因誰地遠虞翻老秋深宋玉悲空摧芳桂  
色不屈古松枝感激激平生意勞歌寄此辭

我因誰者不敢怨乎人也吳虞翻以罪謫交州時吳主遣周  
賀乘海從公孫瓚求馬翻欲諫未敢作表以示刺史呂範範  
不報後賀等還至成山為魏由豫所擧吳主聞之始思翻言  
欲召翻會翻萃芳桂喻人之容色也古松喻人之節操也勞  
歌猶悲歌也宋玉見前○言君自少年蹉跎不遇誠可惜也  
我之竄逐於遠方者因誰致哉亦自取尔若虞翻之老於交

州宋玉之悲乎深秋踈絕無聊亦已甚矣是皆古之有材而志不得伸者材雖可屈而所守之操不可屈譬之芳桂之色雖摧殘而古松之姿則如舊也感激平生不忘久要勞歌此辭以相寄非惟自嘆亦以嘆君之不遇也

經亂離後天恩流夜郎憶舊遊書懷贈江夏韋太守良宰

江夏陽

天上白玉京十二樓五城仙人撫我頂結髮受長生誤逐世間樂頗窮理乱猜九十六聖君浮雲樹空名天地睹一擲未能忘戰爭試涉霸王畧將期軒冕榮時命乃大謬棄之海上行學劍翻自哂為文竟何成劔非萬人敵文竊四海聲兒戲不之道五噫出西京臨當欲去時慷慨淚沾纓

賦也白玉京者五星經云天上有白玉京黃金闕也史記方

士言黃帝時為五城十二樓以候神人撫摩也摩頂而親喻之猶耳提而面命也結髮束髮也初冠之時也漢主父偃云結髮遊學皓首空歸九十六君者自秦始皇至唐玄宗中國傳緒之君凡九十六人也睹一擲者擣菹之勝負睹於一擲也以德謂之王以力謂之霸畧謀畧也軒大車也冕冠也乘軒而戴冕有爵而貴者也時所遇之時命所稟之命也大謬者多相背也莊子曰古之所謂賤士者非伏其身而弗見也非閉其言而弗出也非蔽其寶而不發也時命大謬也學劒習於武也項羽學劒不成謂一人敵不足學乃學萬人敵項梁乃教以兵法声名也五噫者漢梁鴻過京師作五噫之歌曰陟彼北丘兮噫顧瞻帝京兮噫宮室崔巍兮噫人之無良兮噫遼遼未央兮噫出西京者白之辭長安也纓冠係也

此白經亂離後書懷以贈江夏韋太守自敘其平生出處大畧及與江夏來往遊燕之樂避亂憂國之情此則自敘言我自少之時已受玉京仙人長生之訣未及遊仙而誤逐於世間之樂不能忘乎富貴榮辱之念然於古今之治亂亦頗知之三代以往無可言者自秦以來而至于今傳正統之緒而主中國者凡九十六君俱無致治之德徒事戰爭之功視天下如搏菟睹勝負於一擲其虛名之播於世者若浮雲之過太空漠然而無有也霸王之畧我嘗獵涉而學之矣將以取富貴而圖榮華也時命不諧只得棄之而隱去矣男子之所以立名而垂譽者非文則武我之學劒劒不成而翻自哂劒非萬人之敵也我之學文文雖可觀而進無所售徒竊四海之名也矧今之食祿於朝者皆若兒戲罔知國家之大計吾

於是而慨嘆乃作梁鴻五噫之歌而出西京四方土宇之分  
裂從可知矣感慨傷情亦為流涕而沾纓矣此一節太白自  
敘其出處之大畧也

嘆君倜儻材標舉冠羣英開筵引祖帳慰此遠祖征鞍馬若浮  
雲送余驃騎亭歌鍾不盡意白日落昆明十月到幽州戈鋌若  
羅星君王棄北海掃地借長鯨呼吸走百川燕然可摧傾心知  
不得語却欲棲蓬瀛彎弧懼天狼挾矢不敢張攬涕黃金臺呼  
天哭昭王無人貴駿骨綠耳空騰驤樂毅倘再生于今亦奔亡  
蹉跎不得意驅馬還貴鄉逢君聽絃歌肅穆坐華堂百里獨太  
古陶然卧羲皇徵樂昌樂館開筵列壺觴賢豪間青娥對燭儼  
成行醜舞紛綺席清歌繞飛梁歡娛未終朝秩滿歸咸陽祖道  
擁萬人供帳遙相望一別隔千里枯榮異炎涼

倜儻卓異貌標舉特起也驃騎亭在長安漢霍去病為驃騎將軍亭因以名舊注以為謝安所建者非蓋此與昆明並言之也歌鍾者歌曲擊鍾以為節也昆明池名漢武帝所鑿在長安幽州即幽燕也唐屬范陽郡天寶間以祿山為范陽節度使掃地者盡之之辭也長鯨魚之大而暴惡者喻祿山也天狼星名主兵貴鄉猶樂土也指江夏言肅穆者禮儀之容也張衡東都賦云肅肅之儀蓋穆穆之禮殫太古上古也卧義皇者淵明高卧北窓自謂義皇上人徵名也昌樂館名繞梁歌声也博物志云韓娥之齊鬻歌假食既去餘音繞梁三日不絕秩滿者居而考滿也租道祭行道之神也供帳以送行者也炎涼寒暑也異炎涼則隔歲矣燕然蓬瀛黃金臺昭王樂毅駿骨俱見前○此承上言出長安之時韋在京師而

錢送之自幽州回江夏又承燕會之厚不久而別也意謂韋公有卓異之材冠乎羣英開筵祖道送我於驃騎之亭其歌樂之聲未盡乎別離之意日落昆明又已晚矣是韋公在長安祖送之時也自長安一別十月而至幽州值祿山之謀叛戈鋌森列有若星羅勢甚可畏夫祿山者乃羯胡之小醜天子授以三鎮節度委任非人是乃朝廷自弃其北海之地以范陽平盧河東幅幘要害而委於大羊之手也故彼得以逞威恃強憑陵華夏撼動山川無敢禦者其色藏禍心日已久矣我雖知之自分踈遠莫陳一語將欲隱去棲於蓬萊瀛海之間以避其亂猶恐未能也夫祿山者乃天狼之妖星天下之所共疾者我欲彎弓以射之挾矢在手猶不敢張力之不足而情有所畏也所望賢材共靖此難乃攬涕於黃金之臺

呼天而哭昭王昭王不可復作賢材不可復致矣設使樂毅  
再生亦將高蹈而遠去孰肯為之用哉故吾之忠情徒尔切  
切無所補也時不我知旅寓蹉跎失意而返復自幽州歸于  
江夏再聽絃歌君以肅穆之容儀坐於華堂之上百里晏然  
畧無少警君將高卧以治之也而又好賢禮士設樂開宴選  
青娥侍佳賓燈燭之下儼然成行歡娛未久君以秩滿而歸  
咸陽凡送君者祖餞之盛極於一時自此相別遂隔千里榮  
枯不同而歲月亦改矣人生暫會而遽離也有如此哉

炎涼幾度改九土中橫潰漢甲連胡兵沙塵暗雲海草木搖殺  
氣星辰無光彩白骨成丘山蒼生竟何罪幽閔壯帝居國命懸  
哥舒長戟三十萬開門納兇渠公卿如犬羊忠謫醢與殖二聖  
出遊豫兩京遂丘墟帝子許專征秉鉞控強楚節制非桓文軍

師擁熊虎人心失去就賊勢騰風雨惟君固房陵誠節冠終古  
九土九州也橫潰分裂也中橫潰者國祚中微而九州分裂  
也靈運詩曰天地中橫潰白蓋用其語以言當時之事漢甲  
者中國之兵也胡人謂華人為漢人故兵曰漢甲幽閔者深  
險之閔謂潼關也哥舒翰大將也時祿山使崔乾祐屯陝西  
以窺京師帝使哥舒翰將兵二十萬軍于潼關以拒之楊國  
忠疑翰謀已促戰取敗明皇出奔蜀公卿大臣多擒戮二聖  
謂明皇肅宗也遊豫者本古語謂天子巡狩之事白假之以  
諱二聖之出奔也猶春秋書遜之意兩京洛陽長安也帝子  
永王璘也上皇制以璘為山南東道嶺南黔中四道節度使  
得專征伐其所領者皆楚地失去就者去順効逆莫知從也  
房陵在今房州即江夏地方○此敘祿山作亂王師敗績二

帝出奔永王東延而韋太守之能守其地也言我與君一別  
千里而異歲月歲月又幾更矣帝室中微九州分裂漢甲胡  
兵連結不解戰鬪未已而驚塵未靜殺氣衝天而星辰失彩  
白骨橫野高丘山生民之禍亂已極矣民亦何罪乎且吾  
民之所恃者在京師京師之所恃者在潼關潼關凶險實壯  
帝居而哥舒翰以二十萬衆不能死守而反投降是開門而  
納賊也在朝公卿俛首輸服有如大羊驅之即去忠讜之士  
不肯從賊者悉為菹醢則又極其慘酷於是太上皇出奔而  
幸蜀太子召兵救靈武長安洛陽之舊都焚蕩殆盡遂成荒  
丘朝廷以王室多難分命諸王以樹藩衛永王璘者太上皇  
之子也上皇命以專征使之控強楚而保東南不意永王生  
長宮中未諳軍事無齊桓晉文節制之威大將無所稟畏自

恃其勇謀為亂階遂失人心而勤王之意稍懈賊勢乃大熾  
矣斯時也能固守其封疆而無危殆者能有幾人惟君之房  
陵為無虞也君能禦患而保民若此其忠君之誠自守之節  
雖古人亦莫之能及而况於今人乎

僕卧香炉頂食霞漱瓊泉門開九江轉枕下五湖連半夜水軍  
來尋陽滿旌旄空名遠自誤迫脅上樓船徒賜五百金奔之若  
浮烟辭官不受賞翻謫夜郎天夜郎萬里道西上令人老掃蕩  
六合清仍為負霜草日月無偏照何由訴蒼昊良牧稱神明深  
仁恤交道

香炉頂廬山香炉峯也時李白避亂居頂上永王引軍過尋  
陽迫致軍中贈金五百兩欲授以官白俱不受璘敗白論死  
罪郭子儀納官以救之得免死長流夜郎中道赦回負霜草

枯而無生意者也牧守也良牧謂韋江夏晉陸雲為浚儀令  
稱為神明深仁厚德也恤憐念也○此敘避亂獲罪赦回至  
江夏而復遇韋太守也言我因世之亂隱居廬山食霞漱泉  
棲于岩谷之間門對九江枕連五湖逍遙自適如此不意永  
王南巡水軍夜至而旌旗滿乎尋陽彼將召我以自助我實  
以虛名而自誤也我豈不智而黨惡從逆者哉誠以迫脅不  
得已而上其樓船餞我以金授我以官我皆却而不受我固  
非其黨也而乃遠謫於夜郎心不見原罪浮於實亦獨何哉  
且夜郎之地僻在西陲萬里之遙行路艱苦令人易老我之  
受抑亦已多矣今者王室中興掃清六合有罪之人皆蒙帝  
澤而有生意我獨不沾其惠仍如負霜之草尚凋零而憔悴  
也夫帝澤之覃敷有如日月之大明普照八荒而無所偏斯

可也何獨不照於我之中情乎我將仰訴於蒼天天遠而不  
可訴也將近而語於朋友歟惟吾良牧素稱神明其深仁厚  
德能恤交道必不以我為有罪之人而遽棄絕之也

一叅青雲客三登黃鶴樓顧慙稱處士虛對鸚鵡洲樊山霸氣  
盡寥落天地秋江帶峨眉雪川橫三峽流萬舸此中來連帆過  
揚州送此萬里目曠然散我愁紗窓倚天開水樹綠如髮窺日  
畏街山促酒喜得月吳娃與越艷窮竈誇鉛紅呼來上雲梯含  
笑出簾櫳對客小垂手羅衣舞春風賓跪請休息主人情未極  
覽君荆山作江鮑堪動色清水出芙蓉天然去雕飾逸興橫素  
襟無時不招尋朱門擁虎士列戟何森々剪鑿竹石開紫流張  
清深登樓坐水閣吐論多英音片辭貴白璧一諾輕黃金謂我  
不愧君青鳥問丹心五色雲間鵲飛鳴天上來傳聞赦書至却

放夜卽回煖氣變寒谷炎煙生死灰君登鳳池去忽弃賈生才  
黍飯也一黍猶言一飯也樊山隸岳州峨眉三峽俱隸四川  
吳娃者吳俗謂好女爲娃越艷者越女之有艷色者也鉛粉  
白也紅胭脂也雲梯高梯也垂手舞貌小垂手舞名也古樂  
府有大垂手小垂手之舞荆山作韋江夏之詩也江艷江淹  
鮑照皆晉時之詩人也動色者改容而敬之也戟有枝兵也  
禮書後世有祭戟天子二十四諸侯十二唐三品給祭戟許  
列於故里祭戟衣也縈流者水旋繞而流者也史虞卿說趙  
孝王一見立談而賜白璧一双楚人諺云得黃金百不如季  
布一諾青鳥王母之傳信者也阮籍詩云青鳥明我心鵲靈  
鵲也俗傳鵲能報喜故見其飛鳴則知赦之將至也劉向別  
錄云燕谷寒不生五穀鄒衍吹律而溫至生黍也韓安國曰

死灰獨不然乎鳳凰池禁近之地也唐制自魏及晉以來中書監令掌贊詔命以其地在禁近故謂之鳳凰池賈生賈誼也漢文帝謗誼為長沙太傅終不召用○此敘韋江夏相待之厚赦回復會而又將別也言我雖不才昔嘗待詔於金門亦是青雲之客也承君具黍以相餉三登於黃鶴樓我無禰生之才徒對鸚鵡之洲寧無愧乎昔者三國爭雄江夏樊山居於要衝必爭之地今而三國亡霸氣消寒落乎天地之秋矣未免令人多感慨也三峽雪消江流漸漲萬舸順下於揚州舉目曠然而萬里亦足以散我之愁矣樓上紗窓倚天而開但見水中之樹其綠如髮窺白日之易晚乃促酒以交歡又喜得月以相繼也吳越美姬窮窳逞粧呼之上樓則含笑而出於簾櫳之間作小垂手之舞所以款賓者情亦至矣賓

既醉止跪席請休以告燕終主人之意猶未盡也且主人之  
可稱者固不止此其文辭之富麗又非今人可及觀其荆山  
之作雖古之江淹鮑照能文章者亦當動色而加敬焉如美  
蓉初出於清水之中天然秀質不假於雕飾也其飄逸之興  
發於胸中有非塵俗所能拘者常招良朋以相歡樂虎上擁  
於朱門画戟列於館舍剪斲竹石引流開渠登樓坐閣議論  
英發片辭貴於白璧一諾重於千金我忝相知無愧交好惟  
青鳥為能知之也蓋青鳥者乃王母之使能傳信而通靈者  
故能知我之丹心也然所以得此會者天恩所及再生之餘  
近者靈鵲報喜朝廷降赦放回故鄉是猶寒谷之變煖死灰  
之復然也我雖窳逐才猶可觀較之賈生宜與同調君今登  
用入于鳳池旦夕即當別去忽弃賈生之才置於無用之地

矣眷望之情其能已乎

桀犬尚吠堯匈奴笑千秋中夜四五嘆常為大國憂旌旗夾兩山黃河當中流連鷄不得進飲馬空夷猶安得羿善射一箭落旄頭

桀犬吠堯戰國鄒陽曰桀之犬可使吠堯漢蒯通曰桀犬吠堯堯非不仁犬吠非其主耳漢田千秋為高寢郎因戾太子事上書數月為相單于聞之曰漢置丞相非用賢也一男子上書即得之矣兩山者華山首陽本一山後因河流界于其中遂分為兩山西都賦曰巨靈夙顯高掌巨蹠以疏河曲述征記曰河神巨靈擘開以通河流也戰國策秦惠王曰蘇秦約諸侯諸侯不可一猶連鷄之不可以上栖亦明矣淮南子曰羿善射堯命射落九日史記昴為旄頭胡星也○此述古

已憂國之情也。蓋於江夏燕飲之畢，歡娛之餘，而憂懷若此。言祿山之難未平，桀犬尚尔吠堯，所藉以靖難者宰相也。宰相未得其人，有如田千秋者，反為匈奴之所笑。又安能贊理廟堂，制伏其戎狄乎？所恃以勝敵者將帥也。將帥未得其人，則兵徒雖衆，號令不一，若連鷄之不可以前進。飲馬夷猶而怠玩，恐為取敗之道也。安得如羿之善射者，一箭而殞其胡星，將以掃犬羊之腥羶，擣幽燕之巢穴，使天下一旦而清明。今之將相計不出此。我雖雖派竄戀國之情，不能自己。適茲宴會，敢為諸君試一陳之。真相與戮力於王室可也。○按此詩鋪敘次第，當分為六大節。第一節計二十二句，是自敘其平生所業之學術也。第二節計四十二句，敘徃來江夏遭亂相會之情也。第三節計二十四句，敘祿山作亂二帝出奔，永王東

巡而韋江夏能守其疆土也第四節計二十句敘避亂獲罪復得相會於江夏也第五節計四十八句敘韋太守相待之厚而遇赦將別也第六節計十句自敘憂國之情所謂書懷者始終大畧如此舊註分爲二十一節隨文訓字而大義欠明今更定之如右云凡一百六十八句計一十四韻內秋樓同韻而不嫌於先後韻有重複而不避者義不同也盛唐大家脫畧小疵後世拘忌太深故論事敘情晦而不明迂而不切但汎汎於形影之間而已此後世之詩所以不如唐唐人之詩所以不如李杜也說者謂杜于北征李白書懷皆長篇之作冠絕古今可擬風雅然北征論時事而辭嚴義正書懷敷大義而痛切激揚北而較之書懷雖不若北征之純而辭藻清麗情思憂樂充然有餘所以明治亂之迹著君臣之義

者則又未嘗不皎然而明白也二公俱大手筆敘事有條  
而不亂宜芳譽並稱而世為天下之法也

江夏使君叔席上贈史郎中

鳳凰丹禁裏銜出紫泥書昔放三湘去今還萬死餘仙郎久為  
別客舍問何如

賦也紫泥書詔也後漢志天子六璽皆以武都紫泥封之書  
始云石季龍置戲馬觀上安詔書用五色紙銜于木鳳之  
口轆轤回轉形若飛翔仙郎謂史郎中三湘事見前○此李  
白在江夏席上贈史郎中之詩言朝廷頒赦我遭放逐遇赦  
而回出萬死而得一生與郎中久相別離今得復會於客館  
承問起居以敘寒暄也

涸轍思流水浮雲失隱居多慙華省貴不以逐臣疎復如竹林

下叨陪芳宴初希君生羽翼一化北溟魚

省尚書省也逐臣白自謂也如往也春秋云夫人姜氏如齊竹林謂叔姪白與江夏也君謂史郎中也涸轍北溟俱見前○此為答之之詞謂承君之問意固厚矣然我之被難有如涸轍之魚思流水而不可得又如飄揚之浮雲失舊居而無定止也時俗之情孰不我謾惟君以省郎之貴乃不以弃逐而見踈我之感恩反增多愧君赴吾別之召吾亦隨君而往叨陪席次以同歡娛且省郎侍從於朝班力可濟人而澤物况吾居患難之中鎔羽垂翅亦已甚矣所望於君者吹噓披拂生我羽翼使我振起而奮飛有如北溟之魚化而為鵬一舉而高騫也是則脫患難而終惠於我者誠有望於君矣

博晉鄭太守自廬山千里相尋入江夏北市門見訪却之

武陵立馬贈別

大梁貴公子氣蓋蒼梧雲若無三千客誰道信陵君救趙復存  
魏英威天下聞邨郅能屈節訪博役毛薛夷門得隱淪而與侯  
生親仍要鼓刀者乃是袖槌人好士不盡心何能保其身

賦也大梁魏都也公子者魏公子無忌也蓋覆也氣蓋蒼梧  
雲者言其氣之盛若雲之覆於蒼梧也歸藏啓筮曰白雲出  
於蒼梧入於大梁無忌好客食客嘗數千人魏有隱士曰侯  
羸年七十家貧為夷門監者公子嘗置酒大會賓客坐定公  
子從車騎虛左自迎侯生侯生至引坐上坐賓客皆驚後秦  
圍趙公子問計於侯生侯生教公子奪晉鄙兵符薦力士朱  
亥與俱亥袖鉄槌擊殺晉鄙得兵勝秦數年不敢歸客遊于  
趙人有處士毛公藏于博徒薛公藏于賣漿家公子乃間步

往後二人遊秦日夜出兵伐魏、使人請公子毛公薛公說  
公子歸率五国之兵敗秦兵於河上鼓刀者朱亥為屠肆也  
○博晉鄭太守訪李白於江夏而又之武陵博晉魏地武陵  
桃源也故用魏公子無忌及蕤源故事以贈別蓋以魏公子  
信陵君比鄭太守也言白雲出於蒼梧歸於大梁大梁之貴  
公子其氣之浩然者塞乎宇宙之內蓋乎蒼梧之雲矣公子  
所以得此聲譽於天下者以能下士而愛客也設使當時無  
有三千之客安能成此克敵之功楊芳名於後世乎惟能屈  
節以自抑不以富貴而驕人訪毛薛於博徒得侯生於監門  
收朱亥於屠肆乃得奪符救趙安宗社恤國難成此不世之  
功也設使當時不能屈節以下士士必不為之用國且滅亡  
安能保其身乎此公子之好士所以為賢也君能好士其亦

古人之徒歟

多君重然諾意氣遙相託五馬入市門金鞍照城郭都忘虎竹貴且與荷衣樂

漢季布重然諾諺云得黃金百不如季布一諾漢儀天子之車六馬諸侯五馬漢文與太守為銀虎符竹使符楚辭云荷衣兮蕙帶注云謂隱者之草服也○承上言公子無忌博晉大梁之先賢也繼公子之芳躅者其惟君乎我則重君之信義不輕於然諾也遙以意氣相託不遠千里而來以五馬之車入江夏之市金鞍照耀乎城郭閭閻為之生光矣夫以諸侯之階虎竹之貴不為不尊也以我荷衣之賤勢分固相懸絕今乃以貴下賤屈已以相歡邂逅而取樂其與古之貴公子好賢而禮士者夫何異哉

去去蕤花源何時見歸軒相思無終極腸斷朗江猿

蕤花源在朗州蕤源縣即武陵也古歌云巴東三峽巫峽長  
猿啼三聲斷人腸○承上言高軒過我又將別去適彼蕤源  
何時而歸可以再相見也今既未見我之思君者豈有已哉  
一聞朗江之猿即起蕤源之想則憂心如擣未免為之而斷  
腸矣

贈王漢陽

天落白玉棺王喬辭鄴縣一去未千年漢陽復相見猶乘飛鳧  
鳥尚識仙人面髣髴何青之玉顏皎如練

賦也白玉棺飛鳧鳥者漢王喬為葉縣令每月朔常詣朝帝  
怪其道遠而來數令太史伺之但見其臨至時輒有雙鳧從  
東南飛來舉網羅之得雙鳧乃四年間所賜尚書郎之履也

後天下玉棺於堂中吏人推排不能動喬曰天帝將召我即沐浴寢于棺中宿昔葬於城西其夕縣中車牛皆流汗喘之○此李白過漢陽贈邑宰王某之詩也言漢時王喬嘗為葉縣之令天帝召以白玉之棺已仙去矣今者復乘双鳬之舄來為漢陽之令我得識其面貌髣髴青々而未白玉顏皎然而如練也雖曰千歲之餘無異少年之子蓋長生而不老歟吾曾弄海水清淺嗟三變果慙麻姑言時光速流電與君數杯酒可以窮歡宴白雲歸去來何事坐交戰

神仙傳麻姑與王方平曰接待以來見東海三變為桑田向到蓬萊水又淺於往者交戰者言二物並爭未有勝負之謂也子貢云見夫子之道與富貴者交戰於胸中○上言王漢陽能長生而不老矣此言吾亦嘗李大仙人之術者親見海

水三变果如麻姑所言夫海水尚有清淺之日則知時光易過速如流電我將與君持此數杯之酒以盡歡宴之情乘白雲而化去脫塵俗之煩囂功名富貴置之度外一意於從仙斯可也安可兩端不決顧彼戀此而使之交戰於胸中乎

贈盧司戶

秋色無遠近出門盡寒山白雲遙相識待我蒼梧間借問盧耽鶴西飛幾歲還

賦也鄧德明記云盧耽廣州人仕州為治中學仙術身能奮飛每夕輒凌虛歸家曉則還州嘗赴元會至曉不能隨後參預朝列化為白鶴至閣前向翔欲下威儀以驚擲之得一双履耽乃驚還威儀司殿前之儀衛者即今之儀役也舒徐就列白雲蒼梧見前○此贈盧司戶者必秋時而相別也言秋色遍於遠近

而出門皆是寒山景物蕭條離情慘切惟彼白雲若與我而  
相識者待我於蒼梧之間似將候我之歸也我歸或有時矣  
借問盧耽之鶴方西向而飛不知何時而可還乎盖白與盧  
司戶同為遠行之人各有懷歸之念故詩意云但司戶之出  
處無所考也

贈從弟南平太守之遙

東平與南平今古兩步兵素心愛美酒不是顧專城謫官屯源  
去尋花幾處行秦人如舊識出戶笑相迎

賦也東平阮籍也南平白之從弟之遙也晉阮籍拜東平相  
聞步兵厨有酒三百斛乃求為步兵校尉之遙為南平太守  
白自注云南平因飲酒過度貶武陵專城者太守職也屯源  
在武陵○白弟之遙以飲酒見貶贈以此詩言晉之阮籍為

東平之相因嗜酒求為步兵校尉以就兵厨之酒今南平太守亦以飲酒而謫武陵則與阮籍相同是二步兵也其好酒者根乎天性固非官職之所能拘豈以太守有專城之寄者而自加愛惜乎今亦謫官於武陵武陵乃堯源舊地為秦人避亂之所也君至堯源尋花行樂秦人相見有如舊識則當出戶相迎一笑於堯花之下欣然俱為忘世之人矣豈眷於官職者乎

贈潘侍御論錢少陽

繡衣柱史何昂藏鉄冠白筆橫秋霜三軍論事多引納階前虎士羅干將

賦也繡衣者漢侍御史服繡衣也柱史即柱下史侍御史之職也周李伯陽為柱下史鉄冠者法冠也或謂之豸冠白筆

者魏殿中侍御史簪白筆以奏不法干將見前○此李自贈  
潘侍御論錢少陽之詩言其為繡衣柱史氣象昂藏挺然不  
屈戴缺冠簪白筆繩愆而糾繆凜若秋霜之嚴不可犯也軍  
中論事多所引納而籌策之良足以張皇乎六師桓桓武夫  
列於堦前而部伍之肅可以先人而奪人之氣也

雖無二十五老者且有一翁錢少陽眉如松雪齊四皓調笑可  
以安儲皇君能禮此最下士九州拭目瞻清光

說苑介子推行年十五而相荆仲尼聞之使人往視之遠而  
廊下有二十五俊士堂上有二十五老人仲尼曰合二十五  
人之智於湯武并二十五人之力於彭祖以治天下其  
易矣乎四皓事見前○承上言以侍御之職兼軍旅之事任  
大責重須得人以輔佐可也今日所得之人雖無古之二十

五老已得今之一錢少陽矣是少陽也眉如松雪蒼然古貌  
同乎四皓談笑之間可以安儲皇定國祚也身雖下士材實  
過人誠無異於古之老者君能以貴下賤而加禮焉則賢士  
至而芳名起九州之人皆將拭目仰觀清光矣君以待御而  
監軍果能用人以致賢宜乎事無不成而功無不立也

贈柳圓

竹實滿秋圃鳳來何苦飢還同月下鵲三繞未安棲

比也竹實鳳所食也魏樂府曰月明星稀烏鵲南飛繞樹三  
匝無枝可依○鳳凰之性非竹實不食非瓊枝不棲白蓋借  
之以自喻言竹實雖多鳳不得食而苦於飢將皇然然而無  
所之仍如月下之鵲繞樹三匝而不得以安棲也  
夫子即瓊樹傾柯拂羽儀懷君恋明德歸去日相思

離騷注云南方有鳥名鳳天為生樹名瓊枝高二十仞大三  
十圍傾盡也傾柯者言盡瓊樹之柯也羽儀者言鳳之舞有  
威儀也書曰鳳凰來儀○承上言鳳之飢矣而不得食勞矣  
而不得息鳳之受困亦云甚矣然則將何所託乎惟崑崙之  
墟有瓊樹焉既高且大可以託處蓋欲於此振其羽儀盤旋  
而棲息也夫子即瓊樹也宜為鳳之所棲我雖不才亦敢以  
鳳而自喻者所以懷君之明德願託意氣以納交也別後相  
思其能已乎

流夜郎半道承恩放還兼欣剋復之美書懷示息秀才  
黃口為人羅白龍乃魚脰得罪豈怨天以愚觸綱目

興也黃口白龍事俱見前○此李白之書懷敘在已之獲罪  
遇赦幸天下之中興終欲從仙而隱去也首為自敘之辭言

鳥之雖者為人所羅龍之改常服者為漁人所制人之愚昧而無知者乃自陷於法網亦猶黃口之被羅白龍之受制皆自取也豈可委之於天而有所怨乎我之流竄亦宜反躬以自咎然天尤人固不可也

鯨鯢未剪滅豺狼累反覆悲作楚地囚何日秦庭哭

鯨鯢豺狼喻當時之叛者安史與羣盜也左傳晉侯見鍾儀囚使脫之范文子曰楚囚君子也申包胥乞救楚哭於秦庭七日夜不絕聲秦為出兵伐吳而復楚○言安史之大盜未曾剪滅羣盜之翻覆未得寧靜此皆吾所切齒不欲與共戴天者也我方流竄夜郎悲作楚地之囚雖懷寸忠無階可進何日得為秦庭之哭請兵致討以雪吾之國恥乎

遭逢二明主前後兩遷逐去國愁夜郎投身竄荒谷半道雪屯

蒙曠如鳥出籠遙欣尅復美光武安可同

二明主謂明皇肅宗也兩遷逐前在明皇天寶時以高力士  
所沮詔令還山後於肅宗乾元間以永王事流夜郎也屯蒙  
者用易屯蒙意謂在患難而未明也尅復者復東京與長安  
也光武漢之中興君也○言我之不幸雖然遭逢明主又被  
遷逐在太上皇時立朝不久而即賜歸山於今皇帝即位之  
始又以誤罪而遠竄也去國萬里長流夜郎投身於荒谷之  
間寄命於無人之境幸而中途遇赦得雪其屯蒙稍蘇其困  
苦有如鳥之出籠脫樊繫而遂翱翔將悠然而目遠也然吾  
豈特自為一身之幸哉又喜朝廷有尅復之美大中興之功  
比德於商之高宗周之宣王垂譽於無窮也漢之光武豈能  
及乎

天子北劔閣儲皇守扶風揚袂正北辰開襟攬羣雄胡兵出月窟雷破關之東左掃因右拂旋收洛陽宮迴輿入咸京席卷六合通叱咤開帝業手成天地功

天子謂明皇也北劔閣者幸蜀也儲皇謂肅宗為太子時也守扶風者父老於馬嵬請留太子也馬嵬在咸陽西古扶風地也曰北曰守諱之也北辰天子之位胡兵回紇也月窟西方回紇所居之地關東函關以東也洛陽東京咸京即咸陽西京也席卷者如席之卷蓋一斂而無遺也叱呵也咤怒也蓋怒而呵叱也按史祿山以天寶十四年十月反於范陽十五年六月上皇幸蜀十月太子即位於靈武改元至德命廣平王與回紇等收復兩京十月入長安十一月上皇自蜀至長安○此言剋復之美也當兩京陷沒之時天子西走於劔閣

蒙塵在外而幸蜀也太子內守於扶風父老還留國而復也  
既而太子以天子之命即位於靈武從容揚袂而御極虛心  
開襟而用人回紇出兵於月窟勢若雷震於關東掃蕩其妖  
氛收復乎東都乘輿轉入於咸京席卷六合而無虞矣叱咤  
之間再造王室開無疆之帝業成天地之大功中興之美可  
謂光前而絕後矣

大駕還長安兩日忽再中一朝讓寶位劔璽傳無窮

大駕天子之法駕也還長安者明皇自蜀回故都也日者天  
子之象也兩日謂明皇肅宗也日再中者言曷而復正喻明  
皇肅宗既遭播遷而復返于舊都也天子之位曰大寶劔漢  
高祖斬蛇之劔璽秦始皇傳國之璽李斯所篆者歷代相傳  
以為國寶按史肅宗以天寶十五載七月即位於靈武尊玄

宗為太上皇改元至德二載九月克復西京十月復東京十二月上皇自蜀至咸陽上脩法駕迎於望賢宮上著紫袍趨拜捧上皇足嗚咽不自勝上皇索黃袍自為上著之父老賀曰今日復覩二聖相見死無憾矣太子上表避位還東宮上皇不許乾元元年正月戊寅上皇御宣政殿授冊先肅宗即位於

靈武改元至德二年冬十月上皇自京師肅宗上表請避不許復改乾元○此言肅

宗復兩京之後明皇大駕自蜀還長安出於大亂之餘歸於故都之地是猶兩日既晷而復中也一朝以寶位而相讓父子雍容以授受勦墜之傳其無窮矣此中興之美我唐社稷萬年之休也○按兩日字辭似欠瑩不以辭而害意可也

愧無秋毫力誰念矍鑠翁弋者何所慕高飛仰冥鴻弃劒學丹沙臨炉双玉童寄言息夫子歲晚陟方蓬

秋毫至小也漢書光武謂馬援曰矍鑠我是翁也注云矍鑠強貌冥鴻者鴻之飛入於杳冥也楊子云鴻飛冥々弋人何慕焉炉丹炉也煉家所謂鼎器方壺蓬萊皆仙境也○言天下再造王室中興智謀之士皆得拔龍鱗附鳳翼以効尺寸之功惟我以獲罪遠竄獨無秋毫之力為可愧也誰復念我為矍鑠之翁年雖衰邁而材猶有可用者乎世不我知我將高飛而遠舉有如冥鴻使弋人無所慕庶幾遠害以自全也乃弃劒而學仙臨丹炉以鍊藥劒無所用丹或可成尚冀不久升於方壺蓬萊之頂矣是我之志也君其知之否乎

贈張相鎬二首時逃難在宿松作

神器難竊弄天狼窺紩宸六龍遷白日四海暗胡塵

賦也神器者天位也老子曰天下神器不可為也晉書慕容

德論曰跨有全齊竊弄神器竊弄者言其不知天位之重意欲盜竊若侮弄也故以正位相傳曰即真天狼星名主盜賊在井南紫宸天帝所居也六龍日御也迁移也六龍移其白日喻明皇之幸蜀也胡塵謂祿山作亂也○此李白述難在宿松贈張相鍋之詩首言當時之亂謂天子之位不可以智力而竊取今者天狼窺乎紫宸則大盜睥睨乎帝居不知神器之重而欲竊弄之也六龍移其白日乘輿以之而播迁四海暗於胡塵腥羶遍染乎華夏矣是天下之亂已極也

昊穹降元宰君子方經綸澹然養浩氣欵起持大鈞秀骨象山嶽英謀合鬼神位漢解鴻門生唐為後身擁旄秉金鉞伐鼓乘朱輪

元宰首相也降者言天降之也詩大雅云維嶽降神生甫及

申浩氣即孟子所謂浩然之氣也經綸大鈞皆宰相事也秀  
骨者言其骨相之秀起而特異也佐漢鴻門張良也尚書曰  
左仗黃鉞右秉白旄朱輪者二千石以上車輪用朱也○言  
胡虜叛逆國家傾覆尅亂之材屬之誰乎君乃天生之賢宰  
使之經綸乎斯世將以轉亂而為治也一心澹然而無欲養  
其浩然之正氣不次擢用忽躋相位其標格奇秀有若太山  
之岩々英謀潛密有若鬼神之莫測豈漢之子房佐高祖而  
解鴻門之圍者今復生於我唐而為後身乎方總戎於東土  
旄旄秉鉞伐鼓乘車以指揮乎一軍其英謀功業當不在於  
子房之下矣得非天降賢佐以濟中興者乎

虎將如雷霆總戎向東廷諸侯拜馬首猛七騎鯨鱗澤被魚鳥  
悅令行草木春聖智不失時建功及良辰醜虜安足紀可貽悃

與巾倒瀉溟海珠盡為入幕玆馮異獻赤伏鄧  
昆陽舉再觀漢儀新

虎將猛將也詩云進厥虎臣闕如虓虎戰國策曰聖人不能  
為時能不失時耳巾幘婦人之服也蜀志諸葛亮屯五丈原  
司馬懿不敢出兵亮乃遺懿巾幘以愧之倒瀉盡瀉也晉謝  
安云却生可謂入幕之賓矣光武在長安書生馮華自關中  
奉赤伏符至曰劉季發兵捕不道四方雲集龍闕野四七之  
際火為主馮異等遂勸光武即帝位光武初安集河北鄧禹  
見於鄴甚歡昆陽之戰光武以八千人破王莽兵四十二萬  
更始以光武行司隸校尉修洛陽官府吏士喜曰不意今日  
復觀漢官威儀按赤伏符乃馮華事而云馮異者以其事同也馮異傳云諸將勸光  
武即位光武曰我昨夜夢赤龍上天覺悟心中動悸異再拜曰天命發於精神心中

動悸大王謹重之性耳故自以獻赤伏為馮異而不疑華也

此言其領命

統師也行東土諸侯聽其節制皆迎拜於馬前猛士作其勇氣如鯨鯢之奮迅除暴亂以安四方雖魚鳥亦被其澤草木亦沾其惠矣蠡爾胡虜何足算乎可遺巾幘以羞愧之將不戰而自屈也夫將帥之能成其功者由乎得人以自助君能收攬一時之英材皆為入幕之佳賓則馮異鄧禹之徒聞風而至相與平禍亂輔中興庶同光武昆陽之戰再新漢官之儀區醜虜可不日而剪滅矣佐漢之功子房豈得專美於前哉

昔為管與鮑中奔吳隔秦一生欲報主百代期榮親其事竟不就哀哉難重陳卧病宿松山蒼茫空四隣風雲激壯志枯槁驚常倫

太白自注云時在宿松山宿松屬舒州同安縣古吳地也秦  
即長安鎬為侍御史從玄宗入蜀遣詣肅宗所論事尋拜平  
章居京師常倫常等也驚常論者言其異常之甚也○此白  
自敘舊日相交而今困苦言昔日與君結為管鮑之好今我  
逃難寓食於吳君為元宰總戎於秦則相違於數千里之外  
矣且吾平生之志本欲竭力以報君將期榮親於百世不意  
蹉跎一無所就孤負此生誠可哀也難以言語而再陳矣茲  
者逃難又病卧於宿松之山寄身於荒涼之境風雲壯志不  
得一伸徒尔激切於中心枯槁貧寒異於衆人言之而實可  
驚也君寧我知之乎

聞君自天來目張氣益振亞夫得劇孟敵國空無人捫虱對桓  
公願得論悲辛大塊方噫氣何辭鼓青蘋斯言倘不合歸老漁

# 江濱

自天來者言自朝廷命之東也振音真起也漢書吳楚反  
條侯周勃至河南得劇孟喜曰吳楚舉大事而不求劇孟吾  
知其無能為矣空無人者言其國中無人也晉王猛傳桓溫  
入關猛被褐謁之捫虱而談當世之務傍若無人莊子云大  
塊噫氣其名為風宋玉風賦云風生於地起於青蘋之末漢  
江漢水也○言我之枯槁可憐若此所賴以提携者惟故舊  
之大臣耳茲者君承王命自天而下我一聞之目張氣伸不  
勝自幸昔漢之七國謀叛不能用劇孟而亞夫得之隱然一  
敵國也七國之人雖多若無人矣我願為劇孟也晉之王猛  
見桓溫捫虱而談當世之務我願為王猛也對桓公以論悲  
卒得以展其底蘊矣辭之於風長養萬物方將振蕩於大塊

之間豈惜鼓動於青蘋之末乎大賢無所不容必不棄我一  
得之愚使或言焉不合計焉不聽吾將歸老於漢江之濱長  
往而不返矣

其二

我本隴西人先為漢邊將功畧蓋天地名飛青雲上苦戰竟不  
侯當年頗惆悵

賦也隴西者李氏之宗派也按唐世系李氏俱出於周老子  
李耳之後而白乃漢將軍李廣次子敢裔孫也廣為北平太  
守匈奴號為飛將軍避之數歲不敢近邊後從大將衛青伐  
匈奴以後期而自刎不得封侯而死○此白敘其世系及在  
已出處之始終言我李氏本是隴西之人先世有名廣者  
為漢之邊將匈奴畏服功畧獨盛於一時声名遠達於霄壤

雖有戰伐之勞不得封侯之爵功高而賞薄材大而數奇未免有不平之意懷惆悵之心也

世傳崆峒勇氣激金風壯英烈遺厥孫百代神猶王

崆峒山名寰宇記肅州乃古月支之地漢武時為武威酒泉郡崆峒山在焉爾雅曰北戴斗極為崆峒崆峒之人武西主金故秋風謂之金風金風主殺王即旺字神旺者英靈之不衰也○言我李氏祖居隴西之地世傳崆峒之勇壯氣激乎金風肅殺震乎西鄙英烈遠及於厥孫神旺百代而不替今我之為孫子者故得以藉餘休而自振也○按白自謂為廣之厥孫者廣次子教生禹其後李弇為前涼張駿天水太守弇生巡、生高字玄盛為西涼武昭王興聖皇帝白興聖皇帝九世孫也隋末其先以罪徙西域神龍初高宗年號遁還客

巴西因家焉是生白々既長隱岷山後遊任城會稽被召入翰林此白之世系出處大畧也

十五觀奇書作賦凌相如顏龍惠殊寵麟閣憑天居晚途未云已贈澄遭讒毀

奇書異書也揚雄傳蜀有司馬相如作賦甚宏麗溫雅雄壯云每作賦常擬之以為式殊寵異寵也憑依也天子之所居曰天居蔡邕述征云皇家并而天居贈澄失勢貌遭讒毀者力士貴妃沮抑之也○言我承先世遺烈故聰明日啟年十五時已能博觀群書於百家子史無不通也既長而能為辭賦雖古之司馬相如非惟並駕而或過之也天子思我以殊恩如待商山之綺皓或鄉手以調羹或步輦而降迎俾司文章於麟閣依密勿之天居一時榮華可謂極矣但以不能見獎

而作乃至晚途而未已讒言聿興動輒失勢遂遭斥逐之愆而長流於夜郎也

想像晉末時崩騰胡塵起衣冠陷鋒鏑戎虜盈朝市石勒窺神州劉聰劫天子撫劍夜吟嘯雄心日千里誓欲斬鯨鯢澄清洛陽水

想像者倡之也晉末時懷帝時也胡塵起者五胡之亂華也晉永嘉五年石勒與劉聰等率騎三萬寇洛陽陷之執帝辱后妃焚宮廟百官士庶死者三萬餘人使帝着青衣行酒又使執蓋雄心猶言壯心也阮瑀與孫權書曰大丈夫雄心能無發憤者也鯨鯢謂人盜如安史之徒○言已當竄逐之時祿山作亂起自范陽天子西巡諸皇北狩有如西晉之末王室崩頽而五胡紛擾衣冠斃於鋒鏑之下戎虜遍於朝市之

間石勒寇洛陽而陷神州劉聰執惠帝而劫天子今日之事  
實類乎此我之懷忠而抱憤者其能已乎故撫劒而發悲嘆  
之聲雄心馳於千里之外誓欲斬此鯨鯢殲厥渠魁澄清洛  
陽之水條盡腥羶之氣使其隻輪片甲之不留庶幾復我衣  
冠之舊俗是則我之志也奈何遭諛謗而困無所伸徒自悲  
嘆而已矣

六合灑霖雨萬物無凋枯我揮一杯水自笑何區區因人恥成  
事貴欲決良圖滅虜不言功飄然陟蓬壺惟有安期焉留之滄  
海隅

霖雨謂德澤也區區小貌史毛遂曰公等碌碌所謂因人成  
事者也安期焉見二卷○承上言我雖心懷澄清之志然朝  
廷之大化中興之盛業固非我之淺才薄力所能助也譬之

天地之霖雨一洒遍於六合之內萬物沾其潤澤無有凋枯者矣我乃欲持一杯之水以効霖雨之施何其小哉誠可笑也且因人以成事尤為可恥須當自決其良謀及時而立功如有用我者吾當斬鯨鯢清洛水期於成功而後已也設使吾有此功亦是臣子之分所當為者何足矜乎須絕於言議罔圖於爵賞飄然遽入於蓬壺惟由安期之玉舄身不可得而見迹不可得而尋矣是則吾之出處素志若此今者逃難而流離失所甚矣敢以此辭陳於君之左右者庶其知我而恤我也

宿清溪贈主人

夜到清溪宿主人碧岩裏簷楹掛星斗枕席響風水月落西山時啾々夜猿起

清賦也清溪九域志在池州貴池縣秋猿聲也楚辭云猿  
啾兮夜鳴○此夜宿清溪之詩所言皆清溪之夜景星斗  
而風水響月西沉而猿聲啼景物淒涼若此夜宿客懷當何  
如乎此白客遊於宣城時也